

4

社121
673
都大:61



文獻通考卷第二百三十五



鄱陽馬端臨貴與著

經籍考六十二

集別集

薛簡肅公文集四十卷

參知政事薛奎宿藝撰歐陽公序畧曰公絳州正平人自少以文行推於鄉里既舉進士獻其文百軸於有司由是名動京師平生所為文至八百餘篇何其盛哉公之事業顯矣其為文章氣質純深而勁正蓋發於其志如其為人云

劉公是集七十五卷

鼂氏曰劉敞字原父袁州人慶歷中舉進士廷試第一累遷知制誥出知永興爲人明白俊偉自六經百氏下至傳記無所不通爲文章尤敏贍好摹倣古語句度在西掖時嘗食頤草九制各得其體英宗嘗語及原父韓魏公對以有文學歐陽公曰其文章未佳特博學可稱耳

公是劉氏文集後序曰古今之文人多矣其能道胸中之蘊積暢物理之有無合衆美以爲已用超倫類而獨得使其語言如其心其馳騁極所欲環

偉竒正放肆自若非夫豪傑之士不能至是故自申韓管商慎墨屈原之倫其道未必皆是而其書傳焉雖然猶之貴文也若夫原性命之統貫誠明之本考百子之雜博判其真僞雖至於六經可折衷也極帝王之治奉事有功雖在於今日可按行也是好古博雅之士所以貴乎學聖人而得其道真者嗚呼先生之文優出於前人者在是矣傳曰情深而文明氣盛而化神惟深故能通天下之志以極萬物之理則文有不明者乎盛如四時煦育賦子雕刻衆形萌芽天條無有不備是之謂神故

古今之士智有所不周文有所不明由其情之蹇
淺也知其一不知其二善於此不善於彼由其氣
窳而化狹也嗚呼先生可謂備矣

石林葉氏曰慶歷後歐陽文忠公以文章擅天下
世莫敢抗衡者劉原父雖出其後以博學通經自
許文忠亦以是推之作五代史新唐書凡例多問
春秋於原父書梁入閣事之類原父卽爲剖析辭
辯風生文忠論春秋多取平易原父每深言經旨
文忠有不同原父間以謔語酬之文忠久或不能
平復忤韓魏公終不得爲翰林學士將死戒其子

弟毋得遽出其文集後百年世好定當有知我者
故貢父次其集藏之不肯出私謚曰公是先生貢
父平生亦好諧謔慢侮公卿與荆公素厚坐是相
失及死弟子私謚公非先生

朱子曰劉才思極多每作文多法古絕相似有幾
件文字學禮記春秋說學公穀文勝貢父 劉侍
讀氣平文緩乃自經術中來比之蘇公誠有高古
之趣但亦覺詞多理寡苦無甚發明

竹溪林氏曰劉原父於諸經錯綜貫穿自得於心
不肯下荆公荆公實畏之尚書義更定武成先後

脫簡皆從原父

劉公非集六十卷

陳氏曰中書舍人劉攽貢父撰號公非先生敞兄弟俊敏博洽同登慶歷六年進士第敞本首冠以內兄王堯臣爲編排官引嫌遂得第二仕早貴而不永年才五十攽歷州縣二十年晚乃遊館學元祐中始掌外制敞子奉世仲馮亦有名宦至執政世稱三劉

朱子語錄曰劉貢父文字工於摹倣學公羊儀禮孫明復睢陽子集十卷

鼂氏曰孫復字明復晉州人居泰山深於春秋自石介以次皆師事之年四十未娶李丞相廸以其弟子妻之慶歷中范文正公富鄭公言之於朝除國子監直講嘗對邇英閣說詩上欲以爲侍講楊安國沮之而寢

李泰伯退居類稿十二卷 續稿八卷 常語三卷

周禮致太平論十卷 後集六卷

陳氏曰太學說書南城李觀泰伯撰其自序曰天將壽我歟所爲固未足也不然斯亦足以藉手見古人矣類稿慶歷所錄續稿皇祐所錄後集則門

人傳野編泰伯不喜孟子常語專辯之

朱子語錄曰李泰伯文實得之經中雖淺然皆自大處起議論首卷潛書民言好如古潛夫論之類周禮論好如宰相掌人主飲食男女事某意如此今其論皆然文字氣象大段好甚使人愛之亦可見其時節方興如此老蘇父子自史中戰國策得之故皆自小處起議論歐公喜之李不軟帖不爲所喜

少微集三十卷

陳氏曰職方員外郎會稽齊唐祖之撰齊澣之後

天聖八年進士兩應制科皆爲首選以切直報罷居鑑湖東北去城五里名其山曰少微其集顧臨爲之序

樂全先生集四十卷

陳氏曰參政文定公南都張方平安道撰初舉茂材異等再舉賢良方正皆中其科識畧過人知蘇洵父子於布衣惡王安石於考試進士之日皆人所不能及壽八十五薨於元祐中於當時最爲耆德然頗不爲司馬公所喜

東坡蘇氏文集序曰孔北海志大而論高功烈不

見於世然英偉豪傑之氣自爲一時所宗其論盛
孝章郝鴻豫書慨然有烈丈夫之風諸葛孔明不
以文章自名而開物成務之姿綜練名實之意自
見於言語至出師表簡而盡直而不肆大哉言乎
與伊訓說命相表裏非秦漢以來以事君爲說者
所能至也常恨二人之文不見其全今吾樂全先
生張公安道其庶幾乎嗚呼士不以天下之重自
任久矣言語非不工也政事文學非不敏且博也
然至於臨大事鮮不忘其故失其守者其器小也
公爲布衣則頎然已有公輔之望自少出仕至老

而歸未嘗以言徇物以色假人雖對人主必同而
後言毀譽不動得喪若一真孔子所謂大臣以道
事君者世遠道散雖志士仁人或少貶以求用公
獨以邁往之氣行正大之言用之則行舍之則藏
上不求合於人主故雖貴而不用用而不盡下不
求合於士大夫故悅公者寡不悅者衆然至言天
下偉人則必以公爲首公盡性知命體乎自然而
行乎不得已非蘄以文字名世者也然自慶歷以
來訖元豐四十餘年所與人主論天下事見於章
疏者多矣或用或不用而皆本於禮義合於人情

是非有考於前而成敗有驗於後及其他詩文皆
清遠雄麗讀者可以想見其爲人信乎其有似於
孔北海諸葛孔明也昔曾魯公嘗爲賦言公在人
主前論大事他人終日反復不能盡者公必數言
而決粲然成章皆可書而誦也言雖不盡用然慶
歷以來名臣爲人主所敬莫如公者

胡文恭公集七十卷

陳氏曰樞密副使文恭公晉陵胡宿武平撰晉陵
之胡自文恭始大其猶子宗愈仍執政子孫爲侍
從九卿者以十數紹興世將承公亦其後至今爲

名旂

蔡君謨集十七卷

鼂氏曰蔡襄君謨興化人天聖中舉進士在慶歷
四諫官選中累遷至翰林學士權三司使嘗知福
泉杭三州文章清遒粹美工書爲宋朝第一
陳氏曰集三十六卷近世始刻於泉州王十朋龜
齡爲序余嘗宦莆至其居去城三里荔子號玉堂
紅者正在其處矮屋欲壓頭猶是當時舊物歐公
所撰墓誌石立堂下真蹟及諸公書帖多有存者
京卞同郡晚出欲自附於名閥自稱爲族弟本傳

云爾襄孫佃唱名第一京時當國以族孫引嫌降
第二佃終身恨之

鄭毅夫鄖溪集五十卷

鼂氏曰鄭獬字毅夫安州人少俊異爲詩賦有聲
廷試第一累遷知制誥入翰林學士王安石不悅
之乘宰相在告除獬知杭州爲文有豪氣峭整無
長語與滕達道少相善並嗜酒落魄無檢操人目
之爲滕屠鄭沽云

陳氏曰皇祐五年進士首選坐知開封府不肯用
按問新法爲王安石所惡而出廷試園丘象天賦

時獬與滕甫俱有場屋聲甫賦首曰大禮必簡園
丘自然自謂人莫能及獬賦但倒一字曰禮大必
簡丘園自然甫聞之大服果居其次云

曾子固南豐類稿五十卷

鼂氏曰曾鞏字子固南豐人元豐中爲中書舍人
卒子固師事歐陽永叔早以文章名天下壯年其
文慄鷲奔放雄渾瓌偉其自負要自劉向藐視韓
愈以下也晚年始在掖垣屬新官制方除日填委
占紙肆書初若不經意及屬草授吏所以本法意
原職守爲之訓勅者人人不同瞻裕雅重自成一

家歐公門下士多爲世顯人議者獨以子固爲得其傳猶學浮屠者所謂嫡嗣云

陳氏曰王震爲之序年譜朱熹所輯也按韓持國爲神道碑稱類稿五十卷續四十卷外集十卷本傳同之及朱公爲譜時類稿之外但有別集六卷以爲散逸者五十卷而別集所傳其什一也開禧乙丑建昌守趙汝礪丞陳東得於其族孫濰者校而刊之因碑傳之舊定著爲四十卷然所謂外集者未知何當則四十卷亦未必合其舊也
朱子語錄曰南豐文字確實他初亦只是學爲文

却因學文漸見些子道理故文字依傍道理不爲空言只是關鍵緊要處也說得寬緩不分明緣他見處不徹本無根本工夫所以如此但比之東坡則又較質而近理東坡則華艷處多

曾子開曲阜集四十卷 奏議十二卷 西掖集十二卷
內制五十卷 外制三十卷

鼂氏曰曾肇字子開子固之弟也登進士第元祐中爲中書舍人元符末再入西掖遂爲翰林學士前後歷陳穎宋泰海和金陵真定九郡帥守坐兄子宣貶亦以散官汀州安置崇寧末移台州居京

口而終封曲阜侯

陳氏曰肇元祐中爲西掖元符中再入故別名庚辰外制集肇制誥溫潤典雅其草見初拜相制汪玉山稱之以爲得命次相之體

蘇明允嘉祐集十五卷

鼂氏曰蘇洵字明允眉山人至和中歐陽永叔得明允書二十二篇大愛其文辭以爲賈誼劉向不過也以書獻除校書郎與姚子張同編太常因革禮百卷書方成而卒治平史臣謂永叔所獻明允之文甚美大抵兵謀權利機變之言也

陳氏曰洵初入京師益帥張文定薦之歐陽公世皆知之而有雷簡夫者爲雄州以書薦之張歐及韓魏公尤力張之知洵由簡夫世罕知之雷之書文亦慨慷偉麗可喜

南豐曾氏哀詞曰明允始舉進士又舉茂材異等皆不中歸焚所爲文閉戶讀書五六年所有旣富矣乃始復爲文蓋少或百字多至千言其指事析理引物托諭侈能盡之約遠能見之近大能使之微小能使之著煩能不亂肆能不流其雄壯俊偉若決江河而下也其輝光明白若引星辰而上也

朱子語錄曰老蘇文雄渾其父子爲文自史中戰國策得之皆自小處起議論

看老蘇六經論則是聖人全是以術欺天下老蘇門只就孟子學作文不理會他道理然其文亦實是好

蘇東坡前集四十卷 後集二十卷 奏議十五卷

內制十卷 外制三卷 和陶集四卷 應詔集十卷

鼂氏曰蘇軾子瞻洵之長子也軾生十年其母授以書聞古今成敗輒能語其要比冠學通經史屬文日數千言嘉祐中歐陽永叔考試禮部進士梅

聖俞與其事得其論刑賞以示永叔至驚喜以爲異人欲以冠多士疑曾子固所爲乃寘之第二等後以書謝永叔見之語客曰老夫當避此人放出一頭地又以直言薦之答策入上等英宗在藩邸聞其名欲以唐故事召入翰林宰相不可知湖州以表謝上言事者摘其語以爲謗遣官逮赴御史臺初子瞻當王安石紛更法度之際見其事不便於民則賦詩以諷焉言者從而擠陷欲寘之死神宗薄其過責置黃州温公相哲宗累擢中書舍人除翰林學士承旨紹聖中坐草責呂惠卿制直書

其罪誣以訕謗安置惠州徙昌化元符初北還卒於常州初好賈誼陸贄書論古今治亂不爲空言旣責黃州杜門深居馳騁翰墨其文一變平生遇事所爲詩騷銘記書校論撰率皆過人晚喜陶淵明詩和之幾徧爲人英辯竒偉於書無所不通所作文章才落筆四海已皆傳誦下至閭閻田里外至夷狄莫不知名門下賓客亦皆一世豪傑其盛本朝所未有也立朝知無不爲世稱其忠義嘗自比范滂孔融議者不以爲過在黃州日自號東坡居士世因不呼其名止目之爲東坡云

陳氏曰杭蜀本同但杭本無應詔集

朱子語錄東坡文字明快但傷於巧議論有不正当處後來到中原見歐公諸人了文字方稍平大抵已前文字却平正亦不會大段巧說自三蘇文出學者始日趨於巧坡又雄健有餘只下字有不出帖實處東坡文只是大勢好不可逐一字去檢點東坡善議論有氣節其文字晚年不衰蓋是夾雜些佛老添得又鬧熱也

蘇子由欒城集前集五十卷

後集二十四卷 第三

集十卷

應詔集十二卷

乾隆十二年校刊

蘇子由欒城集

經籍六十二

十三

鼂氏曰蘇轍子由洵之次子也年十九中進士第
二十舉直言因所問極言得失策入或欲黜之仁
宗不許擢商州推官以兄得罪從坐謫筠州監酒
宣仁臨朝相溫公擢中書舍人代子瞻爲翰林學
士未幾拜尚書左丞紹聖初責置雷州後北還凡
居雷循七年居許十六年杜門理舊學於是詩春
秋傳老子解古史書皆成自謂得聖賢遺意
陳氏曰欒城真定府縣也蘇氏望趙郡欒城元魏
時屬趙郡故云晚居潁濱自號潁濱遺老故集或
名

東坡蘇氏曰子由之文實勝僕而世俗不知乃以
爲不如其爲人深不願人知之其文如其爲人故
汪洋澹泊有一唱三歎之聲而其秀傑之氣終不
可沒作黃樓賦乃稍自振厲若欲以警發憤憤者
而或者便謂僕代作此尤可笑是殆見吾善者機
也

朱子語錄東坡文字較明白子由文字不甚分曉
平園周氏曰吾友陸務觀當今詩人之冠冕數勸
予哦蘇黃門詩退取欒城集觀之殊未識其旨趣
甲申閏月郊居無事天寒踞爐如餓鳴劉子澄忽

自城中寄此卷相示快讀數過温雅高妙如佳人
獨立姿態易見然後知務觀於此道真先覺也

三蘇年表三卷

陳氏曰右奉議郎孫汝聽撰汝聽當是蜀人敘述
甚詳

東坡別集四十六卷

陳氏曰坡之曾孫給事嶠季真刊家集于建安大
畧與杭本同蓋杭本當坡公無恙時已行於世矣
麻沙書坊又有大全集兼載誌林雜說之類亦雜
以穎濱及小坡之文且間有訛僞勦入者有張某

爲吉州取建安本所遺盡刊之而不加考訂中載
應詔策論蓋建安本無應詔集也

王介甫臨川集一百三十卷

鼂氏曰王安石字介甫撫州臨川人慶歷三年進
士累除制誥神宗在藩邸見其文異之召爲翰林
學士熙寧三年拜中書門下平章事熙寧七年罷
明年再入相九年罷卒年六十六謚文公其壻蔡
卞謂自先王澤竭士習卑陋不知道德性命之理
安石奮乎百世之下追堯舜三代通乎晝夜陰陽
所不能測而入於神著雜說數數萬言其言與孟

軻相上下晚以所覺考字畫音耦橫直深造天地
陰陽造化之理著字說包括萬象與易相表裏崇
寧初卞之兄京秉政詔配文宣王廟近時議者謂
自紹聖以來學術政事敗壞殘酷貽禍社稷實出
於安石云

陳氏曰方嘉祐以前名重一世迹其文學論議操
守使不至大位則光明俊偉不可瑕疵者老蘇曰
使斯人而不用也則吾言爲過而斯人有不遇之
嘆孰知其禍之至此哉何其知之明也

東坡蘇氏曰文字之衰未有如今日者也其源出
於王氏王氏之文未必不善也而患在於好使人
同己自孔子不能使人同顏淵之仁子路之勇不
能以相移而王氏欲以其學同天下地之美者同
於生物而不同於所生惟荒瘠斥鹵之地彌望皆
黃茅白葦此則王氏之同也

王魏公集二十卷

陳氏曰尚書左丞王安禮和甫撰近時厚之順伯
其曾孫也

王校理集六十卷

陳氏曰祕閣校理王安國平父撰安國雖親安石

弟意向頗不合尤惡呂惠卿卒爲所陷坐鄭俠事
奪官歸田里亦會惠卿方叛安石故也尋復之命
下而卒

南豐曾氏序畧曰平甫自少已桀然以材高見於
世爲文思若決河語出驚人一時爭誦之其學問
尤敏而資之以不倦至晚愈篤博覽強記於書無
所不通其明於是非得失之理爲尤詳其文閎富
典重其詩博而深矣世皆謂平甫之詩宜爲樂歌
薦之郊廟其文宜爲典冊施諸朝廷而不得用於
世然其文之可貴人莫得而揜也古今作者或能

文不必工於詩或長於詩不必有文平甫獨兼得
之其於詩尤自喜其憂喜哀樂感激怨懟之情於
詩見之故詩尤多也

廣陵集二十卷

陳氏曰揚州布衣王令逢原撰令少年有盛名王
介甫尤重之年二十八而卒其妻吳氏安石夫人
之女弟也守志不嫁一女遺孕嫁吳師禮其子曰
說所謂吳傅朋也令之墓安石銘之後有劉發者
爲之傳吳氏之墓其姪王雲銘之奉使死磁州者
也

石林葉氏曰王逢原作騷文極工蓋非徒有意言
語嘗渡揚州江中流慨然有感乃作江上詞旣以
爲未極其意又作山中詞寄示王荆公荆公讀中
篇不覺失聲嘆曰秦漢後乃有斯人邪自以爲不
及於是與之交益密逢原早死文字多散落二詞
世少有見者

後村劉氏曰昔讀廣陵集草草用朱筆點出妙處
晚年遂再選一番本朝諸人惟逢原別是一種風
調如靈芝慶雲出爲祥瑞半山崛強於歐蘇無所
推讓非苟嘆服後生者

王深父文集二十卷

王回深父福州侯官人舉進士中第爲亳州衛真
縣主簿卒於治平二年年四十三

南豐曾氏文集序曰當先王之跡熄六藝殘缺道
術衰微天下學者無所折衷深甫於是奮然獨起
因先王之遺文以求其意得之於心行之於己其
動止語默必考於法度而窮達得喪不易其志也
文集二十卷其辭反復辯達有所開闡其卒蓋將
歸於簡也其破去百家傳注推散缺不全之經以
明聖人之道於千載之後所以振斯文於將墜回

學者於既溺可謂道德要言非世之別集而已也
後之潛心於聖人者將必由是而有得則其於世
教豈小補而已哉嗚呼深父其志方強其德方進
而不幸死矣故其澤不加於天下而其言止於此
然觀其所可考者豈非孟子所謂名世者歟其文
有片言半簡非大義所存皆附而不去者所以明
深父之於其細行皆可傳於世也

西麓周氏曰王深父學於歐陽公與王介甫曾子
固劉原甫游其文出歐陽體而尤純淡序事曲折
不窮特壯偉不及也至於摘經傳語以爲賦詞短

而意深有味其言哉文章自漢魏以來體益下至
唐中世韓柳作興之習俗相沿未遽盡革加以五
代亂離死生於矛戟中而文章喪矣國初漸欲修
復古文天聖明道以後歐陽公與穆伯長尹師魯
石守道數君子以大手筆倡之流傳於後遂以歐
陽公爲宗文章高下固自有時哉以吾觀之數君
子之功誠不可泯沒然其離合盛衰關於世道似
亦非偶然者古詩逮齊梁浮靡不振唐自陳子昂
氏以前猶未數也開元天寶之盛李杜之光燄始
長矣同時王摩詰孟浩然韋蘇州片言隻字皆不

入俗惜無李杜詩不得不變也王深父曾子固不
遇歐陽公亦豈作落霞孤鶩等語哉

水心葉氏曰聞之呂氏讀王深父文序使人長一
格事君責難受人抱關諸賦可以熟玩自王安石
王回始有幽遠遺俗之思異於他人而回不志於
利能充其言非安石所能及少假不死及安石之
用未知與曾鞏常秩何如士之出處固難言也

王子直文集

王向子直深父之弟南豐文集序曰子直自少已
著文數萬言與其兄弟俱名聞天下可謂魁竒拔

出之才而其文能馳騁上下偉麗可喜者也讀其
書知其與漢以來名能文者俱列作者之林未知
其孰先孰後考其意不當於理者亦少矣然子直
晚自以爲不足而悔其少作更欲窮探力取極聖
人之指要大行則欲發而見之事業窮居則欲推
而托之文章將與詩書之作者並而文未知其孰
先孰後也然不幸早世故雖有難得之材獨立之
志而不得及其成就此吾徒與子直之兄深甫所
以深恨也

西麓周氏曰子直之於深甫猶穎濱之於東坡也

芝蘭之叢無不香者然子直時有英氣而能力自
蟠屈以就法度可謂有意於文章也

王容季文集

王問容季子直之弟南豐文集序曰敘事莫如書
其在堯典述命羲和宅土測日晷星候氣揆民緩
急兼蠻夷鳥獸其材成輔相備三才萬物之理以
治百官授萬民與衆功可謂博矣然其言不過數
十其於舜典則曰在璿璣玉衡以齊七政蓋堯之
時觀天以歷象至舜又察之以璣衡聖人之法至
後世益備矣曰七者則日月五星曰政者則羲和

之所治無不在焉其體至大蓋一言而盡可謂微
矣其言微故學者所不得不盡心能盡心然後能
自得之此所以爲經而歷千餘年蓋能得之者少
也易詩禮春秋論語皆然其曰測之而益深窮之
而益遠信也世旣衰能言者益少承孔子者孟子
而已承孟子者揚子而已揚子之稱孟子曰知言
之要知德之奧若揚子亦足以幾乎此矣其次能
敘事使可行於遠者若子夏左邱明司馬遷韓愈
亦可謂拔出之材其言庶乎有益者也吾友王氏
兄弟曰回深父曰向子直曰問容季皆善屬文長

於敘事深父尤深而子直容季蓋能稱其兄者也
皆可謂拔出之材令其克壽得就其志則將紹六
藝之遺言其可禦哉

又爲墓銘曰容季孝弟純篤尤克意學問自少已
能爲文章尤長於敘事其所爲文出輒驚人爲人
自重不馳騁街衢亦不子子爲名日與其兄講唐
虞孔子之道以求其內言行出處常擇義而動其
磨礱灌養而不止者吾未能量其所至也不幸其
志未就其材未試而短命死矣初容季之伯兄回
深甫以道義文章退而家居學者所宗而仲兄向

子直亦以文學器識名聞當世容季又所立如此
學士大夫以爲此三人者皆世不常有藉令有之
或出於燕或出於越又不可得之一鄉一國也未
有同時並出於一家如此之盛若將使之有爲也
而不幸輒死皆不得至於壽考以盡其材是有命
矣

按侯官三王之文蓋宗師歐公者也其大家正氣
當與曾蘇相上下故南豐推服其文而深悲其早
世然鼂陳二家書錄並不收入四朝國史藝文志
僅有王深父集纔十卷則止有曾序所言之半而

子直容季之文無傳焉亦不能知其卷帙之多少
可惜也

華陽集一百卷

鼂氏曰皇朝王珪禹玉其先成都人故號華陽後
居開封少好學日誦數千言及長博通羣書慶歷
二年廷試第二嘉祐初入翰林至熙寧三年始參
大政凡爲學士者十五年後拜相薨年六十七謚
文恭

陳氏曰珪典內外制十八年集中多大典冊詔令
其詩雖至寶丹以其好爲富貴語也在相位無所
建明人目爲三旨相公元豐末命珪本無異論亦
緣其備首相不能早發大議依違遷延以召讒賊
云

文獻通考卷第二百三十五

文獻通考卷第二百三十六

鄱陽馬端臨貴與著

經籍考六十三

集別集

司馬文正公傳家集

鼂氏曰皇朝司馬光君實陝州夏縣人初以父蔭入官年二十舉進士甲科故相龐籍薦除館閣校理神宗卽位擢翰林學士御史中丞後除樞密副使力辭而去元祐初拜門下侍郎繼遷尚書左僕射卒年六十八諡文正好學如饑之嗜食於學無

所不通音樂律歷天文書數皆極其妙晚節尤好禮其文如金玉穀帛藥石也必有適於用無益之文未嘗一語及之集乃公自編次公薨子康又沒鼂以道得而藏之中更禁錮迨至渡江幸不失墜後以授謝克家劉嶠刻板上之今光州有集本

范蜀公集一百二十卷

汪玉山序按蜀公墓誌云文集一百卷諫垣集十卷內制集二十卷外制集十卷正書三卷樂書三卷公成都人也應辰守成都凡三年求公文集雖搜訪殆徧來者不一而竟無全書蓋公之沒距今

八十年矣竊意歲月愈久則雖此不全之書亦或未易得也於是以意類次爲六十二卷曰樂議曰使北錄不見於墓誌亦恐其初文集中未必載也而樂議或特出於世俗所哀輯今皆存之又以諫疏內制外制正書樂書附之通爲一百十二卷正書所得止一卷今分爲二司馬溫公論正書其間有云舜無焚廩浚井之事而今之正書無此語豈亦非全書邪

張少愚白雲集三十卷

鼂氏曰張俞字少愚幼通悟於書無不該貫朝廷

嘗以校書郎召表乞授其父隱於岷山之白雲溪
凡六被徵召皆不起爲文有西漢風嘗賦洛陽懷
古蘇子美見而歎曰優游感諷意不可盡吾不能
也

文與可丹淵集四十卷

鼂氏曰文同字與可蜀人進士高第以文學名操
韻高潔畫筆尤妙仕至太常博士集賢校理元豐
初出守吳興至宛邱驛忽留不行沐浴衣冠正坐
而逝

東坡謂與可有四絕詩一楚詞二草書三畫四世

少知者惟予一見識其妙處又有詩云斯人定何
人游戲得自在詩鳴草聖餘兼入竹三昧他日觀
其飛白復恨知與可之不盡也

陳氏曰東坡與之厚善墨君堂記篔簹谷記皆爲
同作司馬溫公稱其襟韻瀟灑如晴雲秋月塵埃
不到其爲人可知矣

容齋洪氏隨筆曰今人但能知文與可之竹石惟
東坡公稱其詩騷又表出美人却扇坐羞落庭下
花之句子嘗恨不見其全比得蜀本石室先生丹
淵集蓋其遺文也於樂府雜詠有秦王卷衣篇曰

咸陽秦王家宮闕明曉霞丹文映碧鏤光彩相鈎
加銅螭逐銀猊壓屋驚蟠拏洞戶鎖日月其中光
景賒春風動珠箔鸞額金窠斜美人却扇坐羞落
庭下花閑弄玉指環輕冰抱紅牙君王顧之笑爲
駐七寶車自卷金縷衣龍鸞蔚紛葩持以贈所愛
結歡其無涯其語意深入騷人闡域又有王昭君
三絕句云絕艷生殊域芳年入內庭誰知金屋寵
只是信丹青幾歲後宮塵今朝絕國春君王重恩
信不欲遣他人極目胡塵滿傷心漢月圓一生理
沒恨長入四條絃令人讀之飄飄然感慨無已也

元章簡玉堂集二十卷

陳氏曰參政錢塘元絳厚之撰絳之祖德昭相吳
越本姓危氏唐末危全諷其伯父也父曰仔倡聚
衆保鄉里兵敗自臨川奔杭州易姓元至今建昌
撫州邵武多危姓絳能文辭晚歲以王介甫薦入
翰林甚稱職遂柄用

鼂氏曰絳鑠廳中進士第爲翰林學士參知政事
立朝無特操晚入翰林諂事王安石及其子弟時
論鄙之工文辭爲流輩所推許卒時年七十六

蒲左丞集十卷

鼂氏曰皇朝蒲宗孟字傳正閬州新井人皇祐五年進士曾公亮薦除館職神宗謂宰相曰宗孟有史才乃同修國史入爲翰林學士除尚書左丞卒年六十六爲人酷暴奢侈蘇子瞻嘗規之云一曰慈二曰儉世以爲中其膏肓之疾

趙懿簡集三十卷

鼂氏曰皇朝趙瞻字大觀盩厔人少善爲古文慶歷五年登進士第治平中侍御史論濮邸事及貶元祐中終於同知樞密院諡懿簡學春秋著書十卷其他文不皆奇也

鮮于諫議集三卷

鼂氏曰皇朝鮮于侁字子駿閬中人景祐中登進士乙科神宗初上書上愛其文以爲不減王陶元祐中仕至諫議大夫侁治經術有法論著多出新意晚年爲詩與楚詞尤精世以爲有屈宋風族姪之武編次有序

東坡蘇氏曰鮮于子駿九誦友屈宋於千載上堯祠舜祠二章氣格高古東漢以來鮮及

少游秦氏曰公晚年爲詩與楚辭尤精蘇翰林讀公八詠自謂欲作而不可得讀九誦以爲有屈宋

之風

石林葉氏曰鼂無咎嘗云頃以諸生見鮮于諫議子駿教之爲文曰文章但取簡易和緩不必奇險如詩言維北有斗不可以挹酒漿此豈不甚平後人因之乃曰援北斗兮酌酒漿一變雖奇以北斗爲酌無已夸乎其甚遂有言上天揭取北斗柄辭至於此則已弊矣極以其言爲然子駿在前輩詩文亦高古初世未有爲騷者自子駿與文與可發之後遂有相繼得其味者也

呂正獻公集二十卷

陳氏曰丞相東萊呂公著晦叔撰

汪玉山序曰應辰頃知成都始得申正獻呂公集蓋散逸之餘哀緝補綴非當時全書矣然見所未見亦不爲少其雜以他人所作者什三四旣而以授公之曾孫金部員外郎企中金部又屬其兄子大麟大虬考訂刊劂爲二十卷方全盛時士大夫家集之藏未必輕出中更黨禁愈益闕匿故一旦紛擾遂不復見而此雖殘缺不全未易得也金部惻然念之欲以所得鍤板庶廣其傳焉應辰方待罪太史論次熙寧元豐以來公卿大夫事實雖前

修盛德蓋有不待言論風旨而可知者然而傳信垂後不可以無證詔求遺書將以補史氏之缺久之無送官者每爲之閣筆而歎也

楊元素集四十卷

鼂氏曰楊繪字元素漢州綿竹人幼警敏讀書一過輒誦至老不忘皇祐初擢進士第二人累擢翰林學士沈存中爲三司使暴其所薦王永年事因貶官終於天章閣待制知杭州嘗居無爲山號無爲子爲文立就

劉狀元東歸集十卷

陳氏曰大理評事鉛山劉輝之道撰輝嘉祐四年進士第一人堯舜性仁賦至今人所傳誦始在場屋有聲文體奇澁歐陽公惡之下第及是在殿廬得其賦大喜旣唱名乃輝也公爲之愕然蓋與前所試文如出二人手可謂速化矣仕止於郡幕年三十六以卒世傳輝旣見黜於歐陽公怨憤造謗爲猥褻之詞今觀楊傑志輝墓稱其祖母死雖有諸叔援古誼以嫡孫解官承重又嘗買田數百畝以聚其族而餉給之蓋篤厚之士也肯以一試之淹而爲此儉薄之事哉

古靈集二十五卷

陳氏曰樞密直學士長樂陳襄述古撰襄在經筵
薦司馬光而下三十三人皆顯於時紹興初詔旨
布之天下集序李忠定綱作

李誠之集三卷

鼂氏曰李師中字誠之中進士科仁宗朝權廣南
轉運使終天章閣待制唐子方貶春州嘗有詩送
行盛傳一時

陳都官集三十卷

陳氏曰都官員外郎嘉禾陳舜俞令舉撰舜俞慶

歷六年進士嘉祐四年制科以言新法謫官南康
與劉凝之騎牛遊廬山詩畫皆傳於世舜俞居蘇
秀境上初從安定胡先生學熙寧中六客其一也
其墓在城南之蘇灣子孫猶宅於烏鎮

張文叔集四十卷

袁州判官張彥博文叔撰曾南豐序畧曰文叔年
未三十喜從余問道理學爲文章雖久窮而講道
益明屬文益工其辭精深雅贍有過人者而比三
遇之蓋未嘗爲余出其文又知文叔自進爲甚強
自待爲甚重皆可喜也

濂溪集七卷

陳氏曰廣東提刑營道周敦頤茂叔撰遺文纔數篇爲一卷餘皆附錄也本名敦實避英宗舊名改焉其仕以舅鄭向任晚年以疾求知南康軍因家廬山前有溪取營道故居濂溪名之二程所從學也又本并太極圖爲一卷遺事行狀附焉

明道集四卷 遺文一卷

陳氏曰監察御史河南程顥伯淳撰三司使羽之後也其父曰珦顥之沒文潞公題其墓曰明道先生

伊川集二十卷

鼂氏曰崇政殿說書程頤正叔撰珦之子也少與其兄顥從汝南周茂叔學元祐初司馬溫公薦於朝自布衣擢說書未幾罷紹聖中嘗謫涪陵顥務讀經明道深斥辭章之學從其遊者多知名於世陳氏曰集凡九卷

河南程氏文集十二卷

陳氏曰二程共爲一集建寧所刻本

張橫渠崇文集十卷

鼂氏曰張載字厚之京師人後居鳳翔之橫渠鎮

學者稱曰橫渠先生呂晦叔薦之於朝命校書崇
文未幾詔按獄浙東既歸卒

孫賢良進卷十卷

鼂氏曰孫洙字巨源廣陵人歐陽永叔舉洙賢良
上策論五十篇極論時事元豐中直學士院奉詔
作靈津廟碑上稱洙學術行誼且大用之暴得風
緩而卒或云上欲復大理獄洙對合旨由是驟進
錢賢良進卷十卷

鼂氏曰錢公輔字君倚武進人從胡瑗學昭陵末
知制誥

王直講集十五卷

陳氏曰天台縣令南城王無咎補之撰無咎嘉祐
二年進士曾鞏之妹夫從王安石遊最久將用爲
國子學官未及而卒爲之誌墓曾肇序其集云二
十卷今惟十五卷

南陽集二十卷

陳氏曰門下侍郎穎昌韓維持國撰封南陽郡公
故以名集沈晦元用其外孫也卷首載鮮于綽所
述行狀而晦跋其後南潤元吉無咎其四世孫

無爲集十五卷 別集十卷

乾隆十二年校刊

經籍六十三

陳氏曰禮部郎濡須楊傑次公撰嘉祐四年進士
元祐中爲郎傑善談禪別集皆爲釋老而釋又十
之九

清江三孔集四十卷

陳氏曰中書舍人新淦孔文仲經父禮部侍郎武
仲常父戶部郎中平仲毅父撰實先聖四十八世
孫嘉祐六年八年治平二年連三科兄弟以次登
第文仲舉賢良對策切直忤時寵舉官范鎮景仁
因求致仕而制科亦自此廢武仲爲禮部第一人
中甲科平仲亦嘗舉制科其著述各數十篇多散

逸弗傳今其存者文仲才二卷武仲十七卷平仲
二十一卷而已慶元中濡須王邁少愚守臨江哀
輯刊行而周益公必大爲之序序畧曰遺文雖存
一二於千百然讀之者知其爲有德之言非雕篆
之習也昔黃太史頌當時人才有曰二蘇聯璧三
孔分鼎張丞相天覺在元符中詆元祐詞臣極其
荒唐謂兩蘇爲狂率則剛直也謂公兄弟配之文
行如何哉

西溪集十卷

陳氏曰翰林學士錢塘沈邁文通撰初以郊社齋

郎舉進士第一執政謂已宦者不應先多士遂居其次實皇祐元年自是爲故事文通吏事精明強敏爲杭州開封府皆有能名從容間暇夙興治事及午而畢卒時年四十餘其孫晦元用宣和中亦魁天下

長興集四十一卷

陳氏曰翰林學士沈括存中撰括於文通爲叔而年少於文通世傳文通常稱括叔今四朝史本傳以爲從弟者非也文通之父扶扶之父同括之父曰周皆以進士起家官皆至太常少卿王荆公誌

周與文通墓及遼誌其伯父振之墓可考括坐永樂事貶晚居京口自號夢溪翁自敘甚詳云山谷黃氏曰沈存中博極羣書至於左氏春秋傳班固漢書取之左右逢其原真篤學之士也

雲巢集十卷

陳氏曰審官西院主簿沈遼獻達撰邁親弟也以兄任爲京官坐法流貶事見揮塵錄自永徙池築室齊山號雲巢竟不復起以上三集刊於括蒼號三沈集其次序如此

蘇魏公集七十二卷

陳氏曰丞相魏國公溫陵蘇頌子容撰紳之子也
紳在兩禁人稱其險詖而頌器局闊厚未嘗與人
較短長其爲相在元祐末大臣奏事多稟宣仁獨
頌必以白哲廟其後免於遷謫蓋上以爲識君臣
之禮故也年逾八十薨於建中靖國之初自草遺
表却醫屏藥死生之際了然集前後序汪藻周必
大撰

呂晉伯輞川集五卷

奏議十卷

鼂氏曰皇朝呂大忠字晉伯藍田人汲公之兄皇
祐中進士除檢詳樞密院吏房文字爲河北轉運
判官累遷寶文閣直學士三帥秦鳳晉伯博極羣
書爲文尚理致有益於用章奏皆親爲文

呂汲公文錄二十卷

文錄掇遺一卷

鼂氏曰皇朝呂大防微仲京兆藍田人皇祐初中
進士第哲宗卽位召知制誥翰林學士拜尚書左
僕射兼門下侍郎紹聖初責授舒州團練副使循
州安置未踰嶺卒大防旣拜相常分其俸之半以
錄書故所藏甚富其在翰林書命典麗議者謂在
元絳之上云

呂和叔誠德集三十卷

乾隆十二年校刊

文獻通考卷三百三十三 經籍六十三

七

鼂氏曰皇朝呂大鈞和叔嘉祐二年中進士第大防仲弟也終於宣義郎鄜延路漕司屬官師張厚之瞻學博文無所不該其文非義理不發

呂與叔玉溪集二十五卷 玉溪別集十卷

鼂氏曰皇朝呂大臨字與叔汲公季弟也登進士第嘗歷太學博士秘書省正字從程正叔張厚之學通六經尤精於禮解中庸大學等篇行於世嘗賦詩云學如元凱方成癖辭類相如始近俳獨倚聖門無一事願同回也日心齋正叔可之

朱子語錄曰呂與叔文集煞有好處他文字極是

實說得好處如千兵萬馬飽滿伉壯

傅獻簡集七卷

陳氏曰中書侍郎獻簡公河陽傅堯俞欽之撰

赤城集十卷

陳氏曰兩浙提刑寧海羅適正之撰治平二年進士學於四明樓郁爲吏健敏頗爲蘇子瞻劉貢父諸公所知台士有聞於世自適始

西塘集二十卷

陳氏曰監安上門三山鄭俠介夫撰治平四年甲科小臣劇上言人所不敢言上爲之感動略施行

其言不惟不怒而已既而竟墮深譴良由呂惠卿欲傾王安石而俠與安國游從厚善遂起獄并陷之俠旣得罪新法遂不罷而本朝之禍本成矣小人勿用之戒可不畏哉安石親惠卿而疎俠豈惟誤國亦以危身後之君子可以監矣

范忠宣集二十卷

陳氏曰丞相忠宣公吳郡范純仁堯夫撰文正公之次子也文正子四人長純佑尤俊有賢行早年病廢以死富文忠志其墓近時禮部尙書之柔者其四世孫也次純禮純粹皆顯用至大官

劉忠肅集四十卷

陳氏曰丞相忠肅公東光劉摯莘老撰凡四舉於鄉試禮部爲第一登嘉祐四年甲科劉元城爲集序述其出處大槩

范子功集五十卷

鼂氏曰范百祿字子功鎮之姪也終於中書侍郎張浮休畫墁集一百卷 奏議十卷

鼂氏曰張舜民芸叟邠州人慶歷中范仲淹帥邠見其文異之用溫公薦爲諫官仕至吏部侍郎後羈置房陵政和中卒其文豪重有理致而最刻意

於詩晚年爲樂府百餘篇自序稱年踰耳順方敢言詩百世之後必有知音者云自號浮休先生唐張鷟稱浮休子芸叟蓋襲之

陳氏曰舜民初用於元祐至元符末爲諫議大夫居職七日所上事六十章崇寧初坐謝表言紹聖逐臣有云脫禁錮者何止一千人計水陸者不啻一萬里又曰古先未之或聞畢竟不知其罪以爲譏謗坐貶

范太史集五十五卷

陳氏曰翰林學士成都范祖禹淳夫撰

朱子語錄曰范淳夫文字純粹下一箇字便是合當下一箇字東坡所以服他東坡輕文字不將爲事微時只胡亂寫去又曰四六語佳莫如范淳夫

灌園集三十卷

陳氏曰鄉貢進士呂南公次儒撰熙寧初試禮部不利會以新經取士遂罷舉欲修三國志題其齋曰袞斧書將成而死其書亦不傳元祐初諸公欲薦進之不及

伐檀集一卷

陳氏曰知康州豫章黃庶亞夫撰自爲序庭堅其

子也世所謂山魃水怪著薜荔之詩集中多此體
庭堅詩律蓋有自來也庶慶歷二年進士

黃魯直豫章集三十卷 別集十四卷

鼂氏曰黃庭堅魯直也幼警悟讀書五行俱下數
過輒記蘇子瞻嘗見其詩於孫莘老家歎絕以爲
世久無此作矣因以詩往來會子瞻以詩得罪亦
罰金元祐中爲校書郎先是秦少游鼂無咎張文
潛皆以文學游蘇氏之門至是同入館世號四學
士魯直之詩尤奇世又謂之蘇黃云紹聖初責置
戎州至徽宗卽位召還嘗因嘲謔忤趙正夫及正

夫爲相諭部使者以風旨所作承天院塔記中語
以爲幸災謗國遂除名編隸宜州以死崇寧四年
也

家傳曰公旣孤從舅尙書李公公擇學公擇嘗過
家塾見其書帙紛錯因亂抽架上書問之無不通
大驚以爲一日千里蘇公嘗薦公自代其畧曰瑰
瑋之文絕妙當世孝友之行追配古人世以爲實
錄公學問文章天成性得落筆妙天下晚節位益
黜名益高世以配眉山蘇公謂之蘇黃公嘗游潛
皖樂山谷寺石牛洞之林泉因自號山谷道人

史贊曰自李杜沒而詩律衰唐末以及五季雖有以比興自名者然格下氣弱么麼骯髒無以議爲也宋興楊文公始以文章蒞盟然至爲詩專以李義山爲宗以漁獵掇拾爲博以儷花鬪果爲工號稱崑崙體嫣然華靡而氣骨不存嘉祐以來歐公稱太白爲絕唱王文公推少陵爲高作而詩格大變高風之所扇作者間出班班可述矣元祐間蘇黃並出以碩學宏材鼓行士林引筆行墨追古人而與之俱世謂李杜歌詩高妙而文章不稱李翱皇甫湜古文典雅而詩獨不傳惟二公不然可謂

兼之矣然世之論文者必宗東坡言詩者必右山谷其然豈其然乎山谷自黔州以後句法尤高筆勢放縱實天下之奇作自宋興以來一人而已

豫章別集一卷

陳氏曰皆集中所遺者如承天塔記黃給事行狀毀壁蓋其顯顯者也諸孫營子耕集而傳之

後村劉氏曰山谷文不如詩詩律不如古古不如樂府其文則專學西漢惜其才力褊局不能汪洋趨起如其紀事立言頗時有類處

鼂無咎雞肋編七十卷

鼂氏曰族父吏部公也公諱補之字無咎幼豪邁英爽不羣七歲能屬文日誦千言王安國名重天下甚許可一見大奇之在杭州作文曰七述叙杭之山川人物之盛麗時蘇子瞻倅杭州亦欲有所賦見其所作嘆曰吾可以閣筆矣子瞻以文章名一時稱其博辯俊偉於文無所不能屈輩行與之交由此聲名藉甚舉進士禮部別試第一而考官謂其文辭近世未有遂以進御神宗曰是深於經可革浮薄元祐中除校書郎紹聖初落職監信州酒後知泗州終於官大觀四年也張耒嘗言無咎

於文章蓋天性讀書不過一再終身不忘自少爲文卽能追考屈宋班揚下逮韓愈柳宗元之作促駕而力鞭之務與之齊而後已其凌厲奇卓出於天才非醞釀而成者自韓柳而還蓋不足道也山谷黃氏曰鼂補之文章有漢唐間風味可以名世往未識鼂無咎時見其作安南罪言天辯縱橫跋遮曲奧雅奇麗常恨同時而不相識其後得相從甚密今不見遂十五年計其文字皆當大進恨隨食南北不能相見耳

石林葉氏集序公少警悟絕人讀太史公書而善

之以爲可至遇有所得皆不由町畦自以意會其
後益縱觀百家馳騁上下數千載無不咀其華而
摘其實故公之文緩急豐約隱顯乘除猝不可以
捕詰如終南太華峻拔連絡虎豹龍蛇騰攫變化
至於優柔宏衍疎宕邃遠則朱絃疏越停雲淵泉
可聽而不可求可望而不可挹也蓋常自謂喜左
邱明檀弓屈原莊周司馬遷相如枚乘及唐韓柳
氏天下亦以爲兼得數子之奧莫敢與之爭卒能
自成一家晚惟文潛與之抗衡是以後世謂之鼉
張云

文獻通考卷第二百三十六

乾隆十二年校刊

文獻通考卷第二百三十六
經籍六十三

二十一

文獻通考卷第一百三十七

鄱 陽 馬 端 臨 貴 與 著

經籍考六十四

集 別集

張文潛柯山集一百卷

鼂氏曰張耒字文潛譙郡人仕至起居舍人嘗爲
宣潤汝潁兗五州守又嘗謫居黃州復州最後居
陳以沒元祐中蘇氏兄弟以文章倡天下號長公
少公其門人號四學士文潛少公客也諸人多早
沒文潛獨後亡故詩文傳於世者尤多其於詩文

兼長雖同時鮮復其比而晚年更喜白樂天詩體多效之云

石林葉氏集序曰元祐間天下論文多曰鼂張鼂余伯舅無咎而張則文潛也文潛之文殆所謂若將爲之而不見其爲者歟雍容而不迫紆裕而有餘初若不甚經意至於觸物遇變起伏斂縱姿度百出意有推之不得不前鼓之不得不作者而卒澹然而平盎然而和終不得窺其際也君與秦少游同學於翰林蘇子瞻子瞻以爲秦得吾工張得吾易而世謂工可致易不可致以君爲難云又曰

無咎雄健峻拔筆力欲挽千鈞文潛容衍靖深獨若不得已於書者二公各以所長名家

秦少游淮海集三十卷

鼂氏曰秦觀字少游高郵人登進士第元祐初除校勘黃本書籍紹聖中除名編隸黃州遇赦北歸至藤州卒蘇子瞻嘗謂李廌曰少游之文如美玉無瑕又琢磨之功殆未有出其右者王介甫謂其詩新精婉麗鮑謝似之少游亦自言其文銖兩不差但以華麗爲愧耳呂氏童蒙訓謂少游過嶺後詩嚴重高古自成一家與舊作不同

文潛張氏曰予見少游投卷多矣黃樓賦哀鐘文卷卷有之豈其得意之文歟少游平生爲文甚多而一一精好可傳

玉山汪氏曰居仁呂公云秦少游應制科問東坡文字科紐坡云但如公上呂申公書足矣故少游五十篇只用一格前輩如黃魯直陳無已皆極口稱道之後來讀書初不知其爲奇也呂丈所取者蓋以文章之工固不待言而尤可爲後人模楷者蓋篇篇皆有首尾無一字亂說如人相見接引應對茶湯之類自有次序不可或先或後也

李方叔師友談記少游言邢和叔嘗曰文銖兩不差非秤上秤來乃等子上等來也某曰今人文章濶達者失之太疎謹嚴者失之太弱少游之文詞雖華而氣古事備而意高如鐘鼎然其體質規模質重而簡易其刻畫篆文則後之鑄師莫彷彿宜乎東坡稱之爲天下奇作也非過言矣少游論賦至悉曲盡其妙蓋少時用心於賦甚勤而專常記前人所作一二篇至今不忘也

陳無已后山集二十卷

鼂氏曰陳師道無已彭城人少以文謁曾南豐南

豐一見奇之許其必以文著元祐中侍從合薦於朝起爲太學博士紹聖初以進非科舉而罷建中靖國初入祕書爲正字以卒爲文至多少不中意則焚之

石林葉氏曰世言陳無已每登覽得句卽急歸卧一榻以被蒙首謂之吟榻家人知之卽猫犬皆逐去嬰兒稚子亦皆抱持寄隣家徐待其起就筆硯卽詩已成乃敢復常蓋其用意專不欲聞人聲恐亂其思故詩中亦時時自有言吟榻者天下絕藝信未有不精而能工者也

朱子語錄曰陳后山文有法度如黃樓銘出當時諸公皆斂衽便是今人都無他抑揚頓挫如仁宗飛白書記大段好曲折甚多過得好墓誌亦好有典有則方是文字其他文亦有太局促不好者后山文字簡潔極有法度做許多碎句子是學史記劉夷叔曰陳無已作文最苦要是鼃張諸人所不及恨其稍儉急非謂文字簡勁爲儉急其詞氣自儉急耳韓退之文字多少自然雄渾

復齋漫錄曰子瞻子由門下客最知名者黃魯直張文潛鼃無咎秦少游世謂之四學士至若陳無

已文行雖高以晚出東坡門故不及四人之著故無已作佛指記云余以詞義名次四君而貧於一代是也而無咎詩云黃子似淵明城市亦復真陳君有道舉化行鄉井淳張侯公瑾流英思春泉新高才更難及淮海一髯秦當時以東坡爲長公子由爲少公無已答李端叔書云蘇公門下有客四人黃魯直秦少游鼂無咎則長公之客也張文潛則次公之客也又次韻黃樓詩云一代蘇長公四海名未已又云少公作長句班馬安得擬謂二蘇也然四客皆有所長魯直長於詩辭秦鼂長於議

論魯直與秦觀書曰庭堅心醉於詩與楚辭似若有得至於議論文宇今日乃當付之少游及鼂張無已足下可從此四君子一一問之其後文潛贈李德載詩亦云長公波濤萬頃海少公峭拔千尋麓黃郎蕭蕭日下鶴陳子峭峭霜中竹秦文倩麗紆桃李鼂論崢嶸走珠玉乃知人才各有所長雖蘇門不能兼全也

陳氏曰后山集十四卷外集六卷談叢六卷理究一卷詩話一卷長短句二卷師道一字履常蜀本但有詩文合二十卷按魏衍作集記云離詩爲六

卷類文爲十四卷今蜀本正如此又言受其所遺
甲乙丙稿詩曰五七文曰千百今四明本如此此
本劉孝驥刊於臨川云未見魏本全仍其舊十四
卷爲正集蓋不知其所謂十四卷者止有文而詩
不與也外集詩二百餘篇文三篇皆正集所無談
叢詩話或謂非后山作后山者其自號也

濟南集二十卷

陳氏曰鄉貢進士華山李廌方叔撰又號月巖集
東坡知貢舉得試卷以爲方叔也置之首選已而
不然賦詩有平生謾說古戰場過眼還迷日五色

之句後竟不第

李文叔集四十五卷

後村劉氏曰李格非字文叔濟南人詩文四十五
卷文高雅條鬯有義味在鼂秦之上詩稍不逮元
祐末爲博士紹聖始爲禮部郎有挽蔡相確詩云
丙吉勲勞猶未報衛公精爽僅能歸豈蔡嘗薦引
之乎挽魯直五言八句首云魯直今已矣平生作
小詩下六句亦無褒辭文叔與蘇門諸人尤厚其
沒也文潛誌其墓獨於山谷在日以詩往還而些
詞如此良不可曉其過臨淄絕句云擊鼓吹竽七

百年臨淄城闕尚依然如今只有耕耘者曾得當
時九府錢試院五言云斗暄成小疾亦足敗吾勤
定是朱衣吏乘時欲舞文亦佳作文叔李易安父
也文潛誌言長女能詩嫁趙明成又曰李文叔筆
勢畧與淇水相頡頏

畢公叔西臺集五十卷

鼂氏曰畢仲游字公叔早登進士第元祐中召天
下文學之士十三人策試翰林院蘇子瞻以公叔
爲第一除集賢校理又表自代云學貫經史才通
世務文章精麗議論有餘白臺郎爲憲漕綽有能

聲後入黨籍終於西京留臺集陳叔易爲之序
何博士備論四卷

陳氏曰武學博士浦城何去非正通撰去非以累
舉對策稱旨授左班殿直教授武學後以東坡薦
授承奉郎司農寺理通判廬州有文集二十卷未
見

廖明略竹林集三卷

鼂氏曰廖正一字明略元祐中召試館職蘇子瞻
在翰林見其所對策大奇之俄除正字時黃秦鼂
張皆子瞻門下士號四學士子瞻待之厚每來必

命侍妾朝雲取密雲龍家人以此知之一日又命取密雲龍家人謂是四學士窺之乃明略來謝也紹聖間明略貶信州玉山監稅鬱鬱不得志喪明而沒自號竹林居士

石林葉氏集序略曰明略嘗言吾深服左氏而樂道范曄之秀正溫繹曄嘗自叙其書以爲但多公家之言而少事外遠致吾所恨亦云邱明不可及也異時有寘吾於曄伯仲之間吾尚無愧徃有評吾文似尹師魯者吾雖不學師魯然意善其言是時余見明略文固多知其所自道不誣也明略自

爲舉子時卽不沿襲場屋一語再舉而取進士其所試傑然已若可以名世者至今爲學者推重蓋其用志深苦而思致精慤淵源所從來者遠矣每一出語輒有區域町畦未有卒然而作者至於出入經傳驅駕前言左招右摘比次回曲他人咀嚼桎杻終不能安者明略繩約隳括如以利刀摧朽木尺箠呵羣羊無不如意故其曲奧簡潔音節適峻精新煥發使人讀之不覺矍然增氣惜其早困不得盡用所長始元祐初天下所推文章黃張鼂秦號四學士明略同直三館軒輊諸公問無所貶

屈欲自成一家然其流落不偶略相似云

邢敦夫呻吟集一卷

鼂氏曰邢居實字敦夫和叔之子也年十四賦明君引蘇子瞻見而稱之由是知名未幾和叔貶隨州敦夫侍行病羸嘔血一日有鈴下老卒驕慢應對不遜敦夫怒而擊之無何卒死和叔怒以敦夫屬吏以故疾日侵而天故黃魯直爲之挽云眼看白壁埋黃壤何況人間父子情蓋隱之也集後有子瞻魯直無咎諸公跋

陳氏曰幼有俊才名聲籍甚一時前輩皆愛之年十九而卒宣仁之誣謗怒爲之也居實未死或能當不義而爭萬一有補於世道是以諸賢尤痛惜焉鼂以道追爲其墓表尤反覆致意

山谷黃氏序陽夏謝師復景回年二十文章不類少年書生語言嘗序其遺稿云方行萬里出門而車軸折可謂實涕今觀邢敦夫詩賦筆墨山立自爲一家甚似吾師復也秀而不實念之令人心折東坡蘇氏跋敦夫自爲童子所與交者皆諸公長者其志豈獨以文稱而已哉百不一見遂與草木俱腐故魯直無咎諸人哭之皆過期而哀江南李

泰伯自述其文云天將壽我歟所爲固未足也不
然斯亦足藉手以見古人矣吾於敦夫亦云

王子立文集

王適子立撰穎濱蘇子由之壻也穎濱序略曰適
從予爲學長於詩騷予自南都謫居江南凡六年
而歸未嘗一日不相從也旣與予同憂患至於涵
詠圖史馳騫浮圖老子之說亦未嘗不同之故其
聞道益深爲文益高而予觀之益久蓋其於兄弟
妻子嚴而有恩和而有禮未嘗有過故予嘗曰子
非獨余親戚亦朋友也

姑溪集五十卷

後集二十卷

陳氏曰朝請大夫趙郡李之儀端叔撰嘗從東坡
辟中山幕府後代范忠宣作遺表爲世傳誦然坐
是得罪編置當塗遂居焉其弟之純官至尚書

大名集四十卷

陳氏曰簽書樞密魏郡王巖叟彥霖撰韓魏公客
也

錢塘韋先生集十八卷

陳氏曰主客郎中錢塘韋驥子駿撰皇祐五年進
士元祐中以近臣薦爲監司數路知明州以左朝

議大夫致仕崇寧中乃卒少以詞賦有聲場屋王荆公喜其借箸賦頗稱道之陳師錫誌墓

強祠部集四十卷

陳氏曰三司戶部判官餘杭強至幾聖撰亦韓魏公客也在幕府表章書記多出其手曾南豐作集序稱其文備古今體兼人所長云

南豐曾氏序略曰幾聖工爲詩語出驚人最爲韓魏公所知魏公喜爲詩每合屬賢士大夫賓客與游多賦詩以自見其屬而和之者幾聖獨思致逸發若不可追躡魏公未嘗不歎其得之晚也其任

幕府魏公每上奏天子以歲時慶賀問候及爲書記四方之所好幾聖爲屬稿草必聲比字屬曲當繩墨然氣質渾渾不見刻畫遠近多稱誦之及爲他文若誌銘序記策問學士大夫則簡古而不少貶以就俗其所長兼人如此

唐子西集十五卷

鼂氏曰唐庚字子西眉山人登進士第早受知於張天覺天覺爲相擢京畿提舉常平且欲用爲諫官天覺去位後言者謂子西常宣言有一網打盡之語貶惠州大觀五年會赦北歸

陳氏曰張商英拜相子西作內前行坐貶惠州歸蜀而卒其文長於議論所著名治存舊正友議賞諸論皆精確

鴈湖李氏曰唐子西文采風流人謂爲小東坡

劉夷叔曰唐子西善學東坡量力從事雖少自成一家其詩工於屬對緣此遂無古意然其品在少游上

後村劉氏曰子西諸文皆高不獨詩也其出稍晚使及坡門當不在秦鼉之下

竹溪林氏曰唐子西學東坡者也得其氣骨而未

盡其變態之妙間有直致處然無一點塵俗亦佳作也

馬子才集八卷

陳氏曰鎮南節度推官鄱陽馬存子才撰元祐三年進士第四人

研軒程氏曰子才文波瀾雄壯英毅有奇氣不可繫維且徐節孝蘇文忠許可最厚淵源有所自矣或疑其過於豪放故宦業不甚顯以沒是未免以成敗論也方新學盛行士皆以穿鑿怪誕相高子才自上庠奉大對首闢災異曲說歸諸人事至論

外患則略西南而獨斥北方淵然有爲國經久意
不溺時好卓卓如此既沒之後川黨議起蘇黃文
字焚毀無遺而子才亦在指揮中故世罕傳傳復
訛舛近得其族黨所儲善本參以板行者精加正
是釐爲十一卷凡爲策二策題四時論三史論二
十二古詩四十六律詩五十絕句八十四記十一
序八書四啟七文疏八雜著四誌銘十三又爲年
譜列於墓碣之次以詳其出處大率得之傳聞雖
未保其無謬其於尊慕師匠則深有意焉既成有
示以舊刊進策十六卷似非本真故不敢附著云

先公曰子才諸史論如論晉人以父母之邦委之
於羣胡殘暴戮辱百餘年間無有奮發以生吾中
國之氣又安得有奇士哉又論後魏謂中國以禮
義文采之腴而飼禽獸之饑此之謂不幸非吾一
人可與之爭古之善戰者能用天下之氣而已矣
嗚呼安得此語聞於炎紹中天之初乎子才從節
孝徐先生游且久其文章雄直雅似節孝今取徐
集中所贈三詩繫家集後并書其說云

斜川集十卷

陳氏曰通直郎蘇過叔黨撰世號小坡坐黨家不

得仕進終於通判中山府鼂以道誌墓稱其純孝
給事中嶠其孫也

九峰集四十卷

陳氏曰太常少卿眉山蘇元老在廷撰東坡從孫
也坡在海上嘗有書往來其罷奉常歸潁昌正坐
元祐邪等未幾遂卒年四十七

清真集二十四卷

陳氏曰徽猷閣待制錢塘周邦彥美成撰元豐七
年進汴都賦自諸生爲太學正邦彥博文多能尤
長於長短句自度曲其提舉大晟府亦由此旣盛

行於世而他文未傳嘉泰中四明樓鑰始爲之序
而太守陳杞刊之蓋其子孫家居於明故也汴都
賦已載文鑑世傳賦初奏御詔李清臣讀之多古
文奇字清臣誦之如素所習熟者乃以偏傍取之
爾鑰爲音釋附之卷尾

清真雜著三卷

陳氏曰邦彥嘗爲溧水令故邑有詞集其後有好
事者取其在邑所作文記詩歌并刻之

寶晉集十四卷

陳氏曰禮部員外郎襄陽米芾元章撰其母閻氏

與宣仁在藩時有舊故以后恩補試銜入仕其上
世皆武官蓋國初勲臣米信之後也視芾爲五世
孫酷嗜古法書家藏二王真跡故號寶晉齋

玉池集十二卷

陳氏曰考功郎湘陰鄧忠臣慎思撰熙寧三年進
士坐元符黨廢不用言者論其議范忠宣謚過實
又坐罰銅崇觀間卒平生著述至多嘗和杜詩全
帙又嘗獻郊祀慶成賦又原廟詩百韻裕陵喜之
擢爲館職今皆軼弗傳所存一二而已玉池其所
居山峰名

樂靜集三十卷

陳氏曰起居舍人鉅野李昭玘季成撰元豐二年
甲科所居有樂靜堂故以名集其姪邴漢老爲書
其後

雲龕李氏曰序略曰東坡罷徐守時伯父以書抵
之坡答書歷道黃張鼂秦數公且曰此數子者挾
其有餘之姿而驚無涯之知必極其所如往而後
已則此安所歸宿哉惟明者念有以反之其意蓋
以彼爲不然而勉其有所至也惟伯父性誠乎忠
厚故其爲文橫鶩別驅曲折演迤而一貫於理有

萬折必東之勢志樂於靜退故其爲文率然其立淵然其止不侈衆目而風神自遠有久幽而不改其操之美學博而思精故其爲牋奏應用之作傳古切今琢削穩密不傷天骨叙事外自爲文章才贍而意新故其爲詩奇麗愜適章斷句絕餘思羨溢得詩人味外之味此其大略也

陳瑩中了齋集三十卷

鼂氏曰陳瓘字瑩中延平人建中靖國初爲右司諫嘗移書責曾布及言蔡京及弟卞之姦惡章疏十上除名編隸合浦以死靖康中贈諫議大夫自

號了翁

陳氏曰汪應辰爲集序以爲出死力攻權姦者天下一人而已非虛語也又有約論十七卷起戰國至後漢安帝蓋讀通鑑隨事有所發明也

陳司諫集兩卷

鼂氏曰陳祐字純益仙井監人登進士第建中靖國初爲臺諫與龔夬任伯雨江公望協力彈擊紹聖姦臣後蔡京用事廢斥而沒

節孝集二十卷

陳氏曰楚州教授山陽徐積仲車撰治平四年進

士以耳聾不能做事母極孝行義純篤古所謂卓
行也東坡謂其詩文怪而放如玉川子政和中賜
謚節孝處士

學易集二十卷

陳氏曰朝奉郎東光劉跂斯立撰忠肅公摯之長
子也與其弟蹈同登元豐二年進士第元祐初以
其父在言路政府不得用紹聖以後復坐黨家連
蹇終其身鼂景迂志其墓比孫明復石守道之徒
爲文無所不長宣防宮賦學易堂記世傳誦之

田承君集三卷

陳氏曰大宗正丞陽翟田晝承君撰晝樞密况之
姪也與鄒道鄉善鄒之貶書曰願毋以此舉自滿
士所當爲者未止此也

道鄉集四十卷

陳氏曰吏部侍郎晉陵鄒浩志完撰浩旣諫立劉
后坐貶徽宗初召還對上首及之獎歎再三問諫
草安在曰焚之矣退告陳瓘瓘曰禍其始此乎異
時姦臣妄出一緘則不可辯矣蔡京素忌之使其
黨作僞疏言劉后殺卓氏而奪其子遂得罪其在
昭州作青詞告上帝有追省當時奏御之三章初

無殺母取子之一字云

婆娑集三十卷

陳氏曰右正言陽翟崔鷗德符撰鷗坐元符上書邪等廢於家治圃號婆娑靖康初召爲諫官力論馮澥之罪忽得孿疾不能行而卒無子其壻衛昂哀輯其遺文

鼂氏曰鷗元符末上書人邪等廢斥幾三十年其爲文最長於詩清婉敷腴有唐人風

劉巨濟前溪集五卷

鼂氏曰劉涇字巨濟蜀人終於太學博士爲文奇

怪

李元應跨鼈集五十卷

鼂氏曰李新字元應仙井監人早登進士第劉涇嘗薦於蘇子瞻令賦墨竹口占一絕立就坐元符末上書奪官謫置遂州流落終身跨鼈仙井山名也

滿氏昌色集二十卷

鼂氏曰滿中行字思復登進士第元豐中爲太學官虞蕃獄起思復獨不絀吏議詔褒之

馮允南集十卷

鼂氏曰馮山字允南普州人鄧綰爲中丞薦爲臺官允南力辭不就士論稱之

滴水集四十卷

陳氏曰集英殿修撰長安李復履中撰元豐二年進士博學有氣節其爲熙河漕有旨造戰艦戰車復奏議者之謬以爲兒戲遂罷其議時論韙之

鼂氏景迂集十二卷

鼂氏曰從父詹事公也諱說之字以道文元公元孫少慕司馬溫公爲人自號景迂生年未三十蘇子瞻以著述科薦之元符中上書居邪中等博極

羣書通六經尤精於易傳邵堯夫之學著太極傳縉紳高其節行嘗守成州時民訴歲旱公以爲十分益蠲其稅轉運使大怒督責甚峻因丐老而歸靖康初以著作郎召遷祕書監免試除中書舍人兼太子詹事俄以論不合去國建炎初終於徽猷閣待制

陳氏曰徽猷閣待制鼂說之以道撰又本止刊前十卷說之平生著術至多兵火散逸其孫子健哀其遺文得十二卷續廣之爲二十卷別本刊前十卷而止者不知何說也劉跂斯立墓誌景迂所撰

見學易集後而此集無之計其逸者多矣說之元豐五年進士元祐初蘇文忠范太史曾文昭皆薦之坐元祐邪等廢棄靖康末始爲從官

鼂氏崇福集三十五卷 四六集十五卷

鼂氏曰從父崇福公也登進士第又中宏詞第一元符末上書居邪等廢斥二十年以朝請郎奉祠崇福宮而終故以名集天才英特爲文章立成明潤密緻世以爲宜在北門西掖云

陳氏曰朝請郎鼂詠之之道撰景迂弟也爲作集序詠之初以蔭爲揚州法曹東坡守揚族兄無咎爲倅以其文呈東坡及至揚詠之具參軍禮趨謁東坡走下庭攜手以上謂坐客曰此竒才也

鼂氏封邱集二十卷

鼂氏曰世父封邱府君諱 字伯宇鑠廳中進士第黃魯直嘗薦之於蘇子瞻云鼂伯宇謹厚守文元家法從游多長者其文已能如此年蓋未二十也願一語教戒之子瞻答云鼂伯宇詩騷細看甚竒麗信乎其家多異材也雖然凡文至足之餘溢爲竒偉今鼂文涉竒似太早可作朋友切磋之語以告之非謂其諱也恐傷其邁往之氣耳後坎壈

終身卒官封邱丞

陶山集二十卷

陳氏曰尚書左丞山陰陸佃農師撰

東堂集六卷 詩四卷 畫簡二卷 樂府二卷

陳氏曰祠部郎江山毛滂澤民撰滂爲杭州法曹以樂府詞有佳句受知於東坡遂有名嘗知武康縣縣有東堂集所以名也又嘗知秀州修月波樓爲之記其詩文視樂府頗不逮

溪堂集二十卷

陳氏曰臨川謝逸無逸撰

竹友集十卷

陳氏曰臨川謝邁幼槃撰逸從弟也呂居仁題其後曰逸詩似康樂邁詩似元暉

浮沚先生集十六卷 後集三卷

陳氏曰祕書省正字永嘉周行已恭叔撰十七入太學有盛名師事程伊川元祐六年進士爲太學博士以親老歸教授其鄉再入爲館職復出作縣永嘉學問所從出也鄉人至今稱博士集序林鉞撰先祖妣先生之第三女先君之所自出故知其本末所居謝池坊有浮沚書院

橘林集十六卷 後集十五卷

陳氏曰密州教授石忭敏若撰崇寧壬午以同進士出身中詞科其文彫琢怪奇殊乏醞藉壓卷策問言王金陵配享先聖事謂其以百聖芻豢甘四海口以六經河漢洗四海心以九達夷路破四海迷以萬金良藥起四海病讀之不覺大笑其人與文皆不足道也集僅二冊而卷數如此麻沙坊本往往皆然

文獻通考卷第二百三十七

文獻通考卷第二百三十八

鄱陽馬端臨貴與著

經籍考六十五

集別集

龍雲集三十二卷 附錄一卷

陳氏曰著作佐郎廬陵劉弇偉明撰元豐進士紹聖詞科曾慥詩選以比石敏若非其倫也龍雲安福鄉名弇所居也

周平園序略曰廬陵自歐陽文忠公以文章續韓文公正傳遂為本朝儒宗繼之者龍雲劉公文忠

薨於潁公方冠不及從之游然斯文未喪何害其
爲韓門籍湜也先是汴京及麻沙刻公集二十五
卷紹興初會昌尉羅良弼徧求別本增至三十二
卷凡六百三十餘篇予嘗論公之文如南郊賦氣
格近先漢已爲秦陵簡擢詩書序記往往祖述韓
柳間或似之銘誌豐腴規摹文忠讀者可以自見
其才學出處具載李彥弼誌銘羅氏跋語云

東觀餘論三卷

陳氏曰祕書郎昭武黃伯思長睿撰伯思右丞黃
履之孫吳園張根之壻於李忠定綱爲中外襟袂

故忠定誌其墓伯思元符庚辰進士年四十而死
好古博雅喜神仙家言白號雲林子別字霄賓有
集一百卷此書止法帖刊誤及序跋古書畫器物
故名餘論

北湖集十卷 長短句一卷

陳氏曰直祕閣知虢州富川吳則禮子副撰其父
中復以孫抃薦爲御史不求識面臺官者也中復
弟幾復嗣復子立禮及嗣復子審禮皆登科有名
譽則禮以父澤入仕晚居豫章號北湖居士

劉左史集四卷

陳氏曰起居郎永嘉劉安節元承撰與從弟安上皆嘗事二程同遊太學號二劉安節元符三年進士爲察官左史晚知宣州以沒

箕穎集二十卷

陳氏曰穎昌曹組元寵撰組本與兄緯有聲太學亦能詩文而以滑稽下俚之詞行於世得名良可惜也謝克家任伯爲集序其子勛跋其後略見其出處蓋宣和三年始登弟郊禮進祥光賦有旨換武階兼閣職詔中書召試仍給事殿中未幾而卒然集中有謝及第啓自叙云蚤預諸生竟叨右列

則未第之前已在西班未知何以也曾慥詩選云六舉不第宣和中詔赴廷試賜第啓中所謂特舉孱微許從俊造慥之言良是序跋不著其實爾

夷白堂小集二十卷 別集三卷

陳氏曰考功員外郎括蒼鮑慎由欽止撰元祐初以任子試吏部銓第一復登六年進士乙科甫脫選卽爲郎然自是數坐累官竟不進其父粹始居吳故葬於吳興

青溪集十卷 附錄一卷

陳氏曰楚州教授臨川汪革信民撰紹聖四年試

禮部第一遂登甲科蔡京當國召爲宗子博士力辭不就年才四十卒呂原明志其墓鼃以道爲詞以哀之革嘗有言曰咬得菜根則萬事可做誠名言也

玉谿集二十二卷

陳氏曰左司員外郎永嘉倪濤巨濟撰其父始徙居廣德濤大觀三年進士燕山之役誦言其非以沮軍罷謫衡州茶陵以死年三十九呂居仁志其墓會吉父爲作集序

竹隱畸士集四十卷

陳氏曰右文殿修撰韋成趙鼎臣承之撰元祐甲科紹聖宏詞又自號葦溪翁其孫綱立刊於復州本百二十卷刊止四十卷而代去遂止

後湖集十卷

陳氏曰丹陽蘇庠養直撰其父堅伯固亦有詩名庠以遺澤畀其子而自放江湖間東坡見其清江曲大愛之由是得名僧祖可正平號癩可者其弟也庠中子扶亦工詩有清苦之節庠紳之後頌之族

劉給事集五卷

乾隆十二年校刊

文獻通考卷三百一十五 經籍六十五

陳氏曰給事中劉安上元禮撰紹聖四年登第歷
臺諫掖垣鎖闥以次對歷三郡而終集中有彈蔡
京疏

章貢集二十卷

陳氏曰祕書監李朴先之撰紹聖元年進士坐言
隆祐之賢廢三十年蔡京欲強致之不屈其教授
西京國子監也程伊川與之甚厚然謂其太直以
洛中風波爲戒朴笑曰不意此言發於先生之口
伊川爲之改容愧謝其風節可畏也

呂吉甫集二十卷

鼂氏曰呂惠卿字吉甫閩人王安石執政擢參知
政事元祐初謫知福州紹聖後累領藩鎮有莊子
解爲文長於表奏

後村劉氏曰考亭論荆公東坡門人寧取呂吉甫
而不取秦少游輩其說以爲吉甫猶看經書少游
翰墨而已孫鴻慶序其文謂辭嚴義密追古作者
李淇水集八十卷

陳氏曰門下侍郎大名李清臣韓魏公壻治平二
年中制科歐陽公愛其文以比蘇軾其爲人亦寬
博有度而趣時嗜權利首主紹述之論意規宰相

亦卒不如其志

張無盡集三十二卷

鼂氏曰張商英字天覺登第調官陝路章惇察訪巴蜀風采傾動西南峽中部使者憂之日夕謀所以待之之禮曲盡因求辯博之士以備燕談或以天覺姓名告因檄召至夔州惇既至杯酒間果以人材爲問部使者卽言之惇令召入天覺不冠服峩中長揖徑就坐左惇負氣敢大言天覺輒吐言壓之惇大喜歸而薦於朝由是召用元祐中爲開封府推官出使河東紹聖初擢御史大觀四年長

星見蔡京罷相乃拜右僕射盡反京之政召用元祐遷客天下翕然歸重朞年去位靖康初遂與司馬溫公范文正公同日降制加贈官爵賜諡文忠臨漢隱居集二十卷

鼂氏曰魏泰字通輔襄陽人曾布子宣之妻弟幼爽邁能屬文嘗從徐禧晚節卜隱漢上人頗言其倚子宣之勢爲鄉里患苦云

梅文安集十五卷

陳氏曰戶部尚書浦江梅執禮和勝撰執禮死於靖康之禍人固哀其不幸而不知吳革趙子昉之

謀執禮實主之事既泄范瓊殺革徐秉哲以子昉
遺虜虜知執禮預謀以根括金銀爲罪問誰爲長
官意在執禮也安扶恐其坐之進曰皆長官也遂
俱死文安者所封開國縣也

李忠愍集十二卷

陳氏曰吏部侍郎臨洛李若水清卿撰後二卷爲
附錄其死事時才三十五歲本名若冰以靖康出
使改今名詩文雖不多而詩有風度文有氣槩足
以知其所存矣

傅忠肅集三卷

陳氏曰待制濟源傅察公晦撰堯俞從孫也宣和
七年以吏部郎接伴虜使虜人入寇使人不來爲
虜驅去幹離不脅使拜不屈見殺

周平園序其集謂公文務體要辭約而理盡甚類
獻簡詩尤溫純該貫間次險韻愈多而愈工

歐陽修撰集六卷

陳氏曰崇仁布衣贈祕閣修撰歐陽徹德明撰徹
死年三十一環溪吳沆哀其詩爲飄然集三卷而
會稽胡衍晉遠取其所上三書併刻之臨川倅廨

丁永州集三卷

陳氏曰知永州吳興丁注葆光撰元豐中余中榜
進士喜爲歌詞世所傳催雪無悶及重午慶清明
皆有承平閑雅氣象有女適樂清令富春李素見
素實先妣之大父母也

演山集六十卷

陳氏曰端明殿學士延平黃裳勉仲撰元豐二年
進士第一人貴顯於崇觀死於建炎年八十七方
三舍法行裳謂宜近不宜遠宜少不宜老宜富不
宜貧不如遵祖宗科舉之制世傳以爲口實

梁溪集一百二十卷

陳氏曰丞相忠定公昭武李綱伯紀撰父夔進士
起家至右文殿修撰黃右丞履之甥也綱娶吳園
先生張根之女亦右丞外孫梁溪名集者修撰葬
錫山忠定嘗廬墓云

襄陵集二十四卷

陳氏曰尚書右丞襄陵許翰崧老撰元祐三年進
士靖康初入西府建炎爲丞轄與黃潛善輩不合
而去

橫塘集三十卷

陳氏曰尚書右丞瑞安許景衡少伊撰亦嘗從程

氏學建炎初爲執政與汪黃不合罷建議渡江幸
建康言者以爲非是及下還京之詔景衡憂卒於
瓜州未幾虜騎奄至維揚倉卒南渡

呂忠穆集十五卷

陳氏曰丞相濟南呂頤浩元直撰後三卷爲燕魏
雜記古今事卷末言金人亂華始末甚詳

忠正德文集十卷

陳氏曰丞相聞喜趙鼎元鎮撰四字高廟所賜宸
翰中語也

周平園序略曰公爲中丞上語范宗尹云鼎在言

路極舉職所言四十事已施行三十六蓋祖宗初
除言事官卽置簿載所言事日多寡當否已行卽
朱銷其下外庭未必知也旣入相虜震合肥決策
親征慮無遺策蓋公氣節端方學術純正筆力又
過人凡處分軍國機務多其視草然後御劄付外
惟德與文又孰加此

龜山集二十八卷

陳氏曰工部侍郎延平楊時中立撰時及從明道
死當建炎四年年八十七於程門最爲壽考

尹和靖集一卷 附集一卷

陳氏曰徽猷閣待制河南尹焯彥明撰子漸之孫
年十九舉進士策問欲誅元祐黨籍不對而出遂
罷舉靖康賜號和靖處士虜陷洛陽闔門遇害死
而復蘇門人潛載以逃客涪州以范元長薦入經
筵擢列侍從葬會稽山

胡文定公武夷集十五卷

陳氏曰給事中崇安胡安國康侯撰紹聖四年進
士第三人仕四十年實歷不及三載著春秋傳行
於世本喜爲文後篤志於學乃不復作其辭召試
日少習藝文不稱語妙晚捐華藻纔取埋明旣覺

昨非更無餘習故其文集止此

致堂序略曰惟鄒魯之學出秦漢隋唐莫有傳授
其間名世大儒僅如佛家者流所謂戒律講論之
宗而已至於言外傳心直超佛地則未見其人是
以聖道不絕如綫口筆袞袞異乎身踐有書徒存
猶無書也逮及我宋熙寧以來先覺傑出上繼回
軻天下英才心悅而誠服然後孔氏述業寔以光
顯五經語孟所載譬如逢春之木有本之瀾生意
流形初非死質成已成物始終有序先臣夙稟大
志聞而知之以仁爲居以義爲用以身修家齊國

治天下平爲效若夫記誦訓詁辯說詞華之習不一與焉其宏綱大用奧義微詞旣於筆削之書發揮底蘊自餘因事有作進則陳之君父退則語於公卿或酬酢朋游或訓教子弟一言一話猶足以證明往昔昭迺來今敢圖家藏遂上御府斯文不墜後裔有榮然父書精深而臣以粗淺之言冠於篇首君學高遠而臣以卑近之論瀆於聰明茲榮也祇所以爲愧歎

朱子語錄曰胡文定公文字皆實但奏議每件引春秋亦有無其事而遷就之者大抵朝廷文字且別處去

默堂集二十二卷

陳氏曰宗正少卿延平陳淵知默撰一字幾叟了翁之姪孫楊龜山門人紹興初嘗爲諫官

致堂斐然集三十卷

陳氏曰禮部侍郎胡寅明仲撰文定公長子也本其兄子初生棄不舉文定收育之旣長俾自絕於本生不爲心喪止服世父之服寅遵行之集中有

與秦丞相書言之甚詳人倫之變古今所未有也
寅宣和進士紹興初已爲從官不主和議秦檜本
與其父子有契分竟謫新州檜死北歸沒於岳州
五峰集五卷

陳氏曰右承務郎胡宏仁仲撰文定季子不出仕
篤意理學南軒張栻其門人也別本不分卷

王履道初寮集十卷 內制十八卷 外制十卷

鼂氏曰王安中字履道真定人政和中有密薦於
上者自監大明倉累擢掌內外制後拜太保鎮燕
山建炎初貶象州爲文瓌奇高妙最長於制誥李

邴入翰林嘗請於上以方今詞林之式上首尾舉
安中之名自號初寮

陳氏曰安中年十四薦於鄉凡四舉乃登第爲中
司受旨攻蔡京京子攸入禁中日夕泣涕告於上
安中亟改翰苑事遂止其自政府出守燕京父子
排之也然安中之進亦本由梁師成始東坡帥定
武安中未弱冠猶及師事焉未卒業而坡去其後
鼂以道爲無極令安中旣第修邑子禮用長牋自
言以新學竊一第爲親榮非其志也以道曰爲學
當謹初何患不遠到安中築室榜曰初寮其議論

聞見多得於以道既貴顯遂諱鼂學但稱成州使君四丈無復先生之號矣甚哉籍湜不畔之難也雲龕李氏序畧曰本朝承五季之後楊劉之學盛於一時其裁割纂組之工極矣石介憤然以楊公破碎聖人之道爲世巨害著論排之甚力然當時文宗鉅儒司翰墨之職者亦必循本朝故事如近世張公安道高簡粹純王公禹玉溫潤典裁元公厚之精麗穩密蘇東坡先生雄深秀偉皆制詞之傑然者譬之王良造父策驥騄而騁康莊一日千里而節以和鑿馳之蟻封亦必中度豈能彼而不

能此哉初寮先生太保王公自布衣以文稱天下由東觀入掖垣由烏府登鼂禁皆天下第一選司內外制者累年其所製體大而義嚴事覈而旨深奇而不失正雄而不爲夸褒勲勞則有帶礪丹青之信施濡宥則有雨露涵濡之澤文治平則祥極乎鳳麟申戒飭則誠著乎金石嘉武節則毅乎彪虎之威美文德則昭乎藻火之華極其致蓋與本朝三數公不相上下而馳驟乎燕許常揚之域若不以體製拘之駸駸乎漢氏矣蓋公天才英邁筆力有餘於文於詩皆瓌奇高妙無所不能故出爲

世用者如此自徽宗皇帝卽位以來擅制誥之美者公一人而已得不謂一代之奇文歟

周平園序畧曰公年二十有七游五臺爲竹林泉賦以將相喻泉石格高而意新送某贈大父詩云不論與汝小一月政自容君數百人專用吾宗公瑾伯仁事致推尊年德之意精切混成不類少作時方諱言蘇學而公已潛啓其祕鑰久之徽宗旁求文士召寘館閣給札親試驟掌書命由中司入北門歷二轄其制誥表章詩文大率雅重溫潤而時發秀傑之語定功繼伐等碑睿謨曲宴百韻詩

多出特命上恩與天通矣萬目睽睽徒謂其鶴鳴九臯而不知奪胎換骨自有仙手故未嘗以曲學指之今前集四十卷是也中興南渡四海名勝遷謫避地萃於湖廣而公壻趙奇子辟章又家之游夏大篇短章更唱迭和旣已盡發平昔之所蘊且復躬閱事物之變益以江山之助心與境會意隨辭達韻遇險而反夷事積故而逾新他人瞠乎其後我乃綽有餘裕至如桂柳佛寺諸記閎深辨麗近坡暮年之作黃張鼃秦旣沒系文統接墜緒誰出公右豈止襲其裳佩其環而已今後集十卷是

也

汪彥章浮溪集六十卷

陳氏曰翰林學士婺源汪藻彥章撰四六偶儷之文起於齊梁歷隋唐之世表章詔誥多用之然令狐楚李商隱之流是爲能者殊不工也本朝楊劉諸名公猶未變唐體至歐蘇始以博學富文爲大篇長句叙事達意無艱難牽強之態而王荆公尤深厚爾雅儷語之工昔所未有紹聖後置詞科習者益衆格律精嚴一字不苟錯若浮溪尤其集大成者也

孫鴻慶序言其文貫穿百氏網羅舊聞文從字順體製亦渾然不見刻畫如金鐘大鏞叩之輒應當大典冊深淳雅健追配古作所謂常揚燕許諸人皆莫及也

石林總集一百卷 年譜一卷

陳氏曰尚書左丞吳郡葉夢得少蘊撰紹聖四年進士崇觀間驟貴顯三十一歲掌外制次年遂入翰林中廢至建炎乃執政然才數日而罷平生所歷州鎮皆有能聲胡文定安國嘗以其蔡潁南京之政薦於朝謂不當以宿累廢晚兩帥金陵當元

木臨江移三山平羣寇其功不可沒也秦檜秉政
欲令帥蜀辭不行杵檜意以崇慶節度使致仕其
居在下山奇石森列藏書數萬卷旣沒守者不謹
屋與書俱燼於火石林二字本出楚辭天問

石林建康集十卷

陳氏曰皆帥建康時詩文其初以所莅官各爲一
集後其家編次總而合之此集其一也

石林審是集八卷

陳氏曰其門人盛光祖子紹所錄亦已入總集

翟忠惠集三十卷

陳氏曰參政丹陽翟汝文公巽撰汝文制誥古雅
多用全句氣格渾厚近世罕及夫人邢氏恕之女
居實其弟也長子耆季實邢出好古博文高尚不
仕忠惠者私謚也

鴻慶集四十二卷

陳氏曰戶部尚書晉陵孫覲仲益撰大觀三年進
士政和四年詞科代高麗謝賜燕樂表膾炙人口
生元豐辛酉卒乾道己丑蓋年八十九可謂耆宿
矣而其平生出處至不足道也嘗提舉鴻慶宮故
以名集

周平園序畧曰公軼羣邁往賦才獨異而復天假之年磨淬鍛煉重之以湖山之助名章雋語少而成壯而盈晚而愈精靖康時爲執法詞臣其章疏制誥表奏往往如陸敬輿明辯駿發每一篇出世爭傳誦耄年爲論譔次對親爲謝表啓各出新意用事屬詞少壯所不逮

綦北海集六十卷

陳氏曰翰林學士北海綦密禮叔厚撰工於四六秦檜初罷相密禮當制有御筆詞頭藏其家檜再相下台州追索時密禮已死幸不及禍

雲龕草堂後集二十六卷

陳氏曰參政鉅野李邴漢老撰明受之變以兵部侍郎直學士院叱責兇渠朝廷賴焉旣復辟首擢執政周益公作神道碑言前後集一百卷今惟後集蓋皆南渡後所作也朱文公爲之序漢老樂靜右史之姪五世祖濤五代時宰相石晉之亂弟澣在翰林陷於虜及邴立節於建炎而弟鄴守會稽亦隨金人北去世以爲異

龜溪集十二卷

陳氏曰知樞密院忠敏吳興沈與求必先撰建炎

紹興之間歷三院翰苑以至執政嘗奏言王安石之罪大者在於取揚雄馮道當時學者惟知有安石喪亂之際甘心從僞無仗節死義之風實安石倡之此論前未之及也紹興七年終於位

陳參政簡齋集二十卷

鼂氏曰陳與義字去非汝州葉縣人中進士第宣和中徽宗見其所賦墨梅詩喜之遂登冊府建炎中掌內外制拜參知政事以卒晚年詩尤工周葵得其家所藏五百餘篇刊行之號簡齋集

陳氏曰去非其先蓋蜀人東坡所傳陳希亮公弼

者其曾祖也崇觀間尙王氏經學風雅幾廢絕而去非獨以詩名中興後遂顯用

後村劉氏曰元祐後詩人迭起一種則波瀾富而句律踈一種則煨煉精而情性遠要之不出蘇黃二體而已及簡齋出始以老杜爲師墨梅之類尙是少作建炎以後避地湖嶠行路萬里詩益奇壯元日云後飲屠蘇驚已老長乘舴艋竟安歸除夕云多事鬢毛隨節換盡情燈火向人明記宣靖事云東南鬼火成何事終待胡鋒作爭臣

謂方臘不能爲患直

待粘岳陽樓云登臨吳蜀橫分地徙倚湖山欲暮

時又云乾坤萬事集雙鬢臣子一謫今五年聞德音云自古安危關政事隨時憂喜到樵漁五言云泊舟華容縣湖水終夜明凄然不能寐左右菰蒲聲窮途事多違勝處心亦驚三更螢火鬧萬里天河橫腐儒憂平世況復值甲兵終焉無寸策白髮滿頭生造次不忘憂愛以簡嚴掃繁縟以雄渾代尖巧第其品格當在諸家之上

捫膝先生文集

尙書郎三嵎喻汝礪撰後溪劉氏序畧曰靖康之難虜議立僞楚以絕民望先生捫其膝曰此膝豈

可屈哉卽日挂冠神武門遂自號捫膝居士由是名重海內先生之於學不古不好於文不古不嗜於事不古不愜故其於名節不古不止也旣沒六十年而文集始出嗚呼此豈如時花候禽可悅一時耳目之比宜其愈久而愈難泯也蓋先生之文一字不肯苟於下筆每篇率能馳騁上下濤起阜湧力有餘而氣不竭辭旣工於理與事又欲明白而深切其得無傳乎

昭德龜公文集六十卷

侍郎龜公武子止撰後溪劉氏序畧曰國家丙午

之變中原衣冠不南渡則西入於蜀其入於蜀者
有能言當時理亂興喪之由而明乎得失之跡歷
歷道往事誦京洛之遺風者鮮矣藉令有之而能
達之乎文辭可使耳目尚接乎而後之人有傳焉
者亦又鮮焉昭德龜公蓋能言當時理亂興喪之
由而明乎得失之跡道往事誦遺風而又能達之
乎文辭以傳者也其經事之多嘗艱之久而學日
益強文日益力猶以爲未足其答進士劉興宗書
曰僕少時貫穿羣書出入百氏旁逮釋老恢詭之
學一再終日其勤亦至矣亡得焉反而求之六藝
雜也則公之學可觀矣

宇文肅愍公文集

贈開府儀同三司宇文虛中撰後溪劉氏序畧曰
公羈絕域者十五年而朝廷悉發其家人北去後
四年父子謀覺而闔門被禍矣公弟兄早以才奮
皆致位二府公之文章又最見稱於當世余讀其
爲館職時所與開封尹論事書而壯之使充是書
以往足以追古人而並駕公旣亟見用於尚文之
日潤色太平黼藻休烈則余之所謂繫一時所遇

而作非公之所欲充而不已者也故公答曾晦之書云僕長而游太學爲科舉所使及得一官又屢爲應制代言之文皆非得已而爲者去歲得罪杜門於此閑取篋中書史卧而讀之日盡數卷乃知古人之未嘗爲文也惟其無意於爲文而遇事乃言則其優游舒泰奮迅豪蕩蓋無施而不可昔嘗謂西漢制詔妙絕於元成間而章疏奏對至谷子雲而工極無以復加矣迨今思之則不然惟高帝立長沙王令諸吏善遇高爵及省賦舉賢等詔呂后孝文賜匈奴單于書楚王信以下上尊號相國何等議天子所服此等數篇卓然渾成非司馬相如王褒輩冥搜巧繪所能至也公之此書至論古之人成德爲行隱然出處之大致亦非有意於其間又觀所與趙慶長論文書亦曰不若清明廖邈之爲愈也挺臣欲表出其先大父之文卽二書所言余又何加焉

杜起莘文集

殿中侍御史杜莘老起莘撰後溪劉氏序畧曰公學術之正文辭之典氣節之剛與王公龜齡大畧相似而公奮起孤遠爲尤難余嘗得公奏疏而讀

之其言五穀藥石也公卒四十餘年余守眉陽又
得公他文閱之嘆曰善哉窮之言達之行也今年
又得公經論千餘篇信乎公之學得於孟子者歟
世益降士之爲文益浮噫無復斯文也已

西山老文集二十四卷

豫章胡直孺少汲撰紹興中仕至刑部尙書孫鴻
慶序畧曰公少工於詩語出驚人魯直一見擊節
嘆賞指示佳處數十語表而出之他文稱是筆力
雄贍所爲賦頌表啓記序銘贊之屬蓋數萬言如
行雲流水自然成文

胡承公集十卷 資古紹志集十卷

鼂氏曰胡世將字承公中進士科早受知鼂無咎
建炎南渡嘗直學士院終於資政殿學士川陝宣
撫使爲文敏贍溫雅掌書命頗有能聲喜聚金石
刻效歐公集古錄爲資古紹志集序云以成其先
人之志故以紹志目其書

陳氏曰文恭公宿之曾孫以兵部侍郎爲川陝副
宣金虜敗盟繼吳玠之後經畫守禦以迄和議再
成分疆未定死於河池世將好古博雅有資紹志
錄效集古錄跋尾亦見集中謚忠獻

邵氏集二十卷

鼂氏曰邵溥字澤民進士第靖康初爲戶部侍郎上踐祚以例貶官紹興中復待制宣撫川陝師事崇福十二歲詩文早有能聲

文獻通考卷第二百三十八

文獻通考卷第二百三十九

鄱陽馬端臨貴與著

經籍考六十六

集別集

空青遺文十卷

陳氏曰直寶文閣曾紆公袞撰紆布之子有異材建中靖國初布在相位奉詔爲景靈西宮碑紆之筆也建炎紹興之際將漕江浙入爲司農少卿知信衢州以卒汪彥章志其墓孫仲益序其文王銍性之其壻也

孫鴻慶序公文章固守家法而學詩以母夫人魯國魏氏爲師句法清麗絕去刀尺有古詩之風黃魯直遷宜州道出零陵得公江越書事二小詩書團扇上諸詩人莫能辯也

先公序畧曰余自誦涪翁扶藜對蘚之吟曲阜把卷臨燈之句固已心慕公衮才章之盛顧前修日遠自乾淳諸老文字猶多遺落况過江前後間乎一日西泉吳太史爲言此吾鄉空青公也有集藏於家余惟空青公子弟起家文章繼世潛逃於家君柄用之時繾綣於諸賢流落之後未幾滅跡毀

廬相隨入黨迄天地重開迨能以三朝正論暴白於世視同時諸貴公子孫所謂繼志述事者其爲人賢不肖何如也昔石林葉公以親見揚雄美其詩以新樣元和評其書以三世風流頌其文近世李鴈湖亦謂人惡雋異俗疵文雅如空青諸人雖不偶於一時而文采爛然垂後著世不能掩也今其遺文如魯殿秦碑見者珍惜自可孤行於南豐曲阜之後云

北山小集四十卷

陳氏曰中書舍人信安程俱致道撰俱父祖世科

而俱乃以外祖鄧潤甫蔭入仕宣和中賜上舍出身爲南宮舍人紹興初入西掖徐俯爲諫大夫封還詞頭罷去後以次對修史病不能赴而卒

石林葉氏序畧曰余居吳始識致道見其學問風節卓然有不獨見於其文者卽爲移書當路并上其文數十篇宰相見而驚曰今之韓退之也亟召見政事堂其後二十四年間卒登侍從爲天子掌制命文章擅一時今觀其文精確深遠議論皆本仁義而經緯錯綜之際則左邱明班孟堅之用意也至於詩章兼得唐中葉以後名士衆體晚而在

朝雖不久遇所建明尤偉蓋其爲人剛介自信擇於理者明所行寧失之隘不肯少貶以從物是以善類皆相與推先惟恐失之雖有不樂之者亦不敢秋毫加疵病信乎直道之不終屈也

陵陽集五十卷

陳氏曰中書舍人仙井韓駒子蒼撰自幼能詩黃太史稱其超軼絕塵蘇文定以比儲光羲游太學不第政和初獻書召試出身後入西掖坐蘇氏鄉黨曲學罷

丹陽集四十二卷 後集四十二卷

陳氏曰顯謨閣待制江陰葛勝仲魯卿撰紹聖四年進士元符三年詞科洪慶善序其文有所謂絕郭天信拒朱勔慙盛章而怒李彥者蓋其平生出處之畧也再知湖州後遂家焉

孫鴻慶序畧曰公中宏詞第一時天子輯瑞應蒐講彌文報禮上下四方以符瑞來告者不可勝數大臣表賀皆出公手瓌奇英麗獨步一時公卿交譽屢遷擢大司丞遂躋法從

毘陵集五十卷

陳氏曰參政文清毘陵張守全真撰一字子同崇

寧進士詞科紹興執政張魏公在相位薦秦檜再用守有力焉一日與魏公言某誤公聽今朝夕同班列得欵曲其人似以曩者一跌爲戒有患失心宜自劾謝上魏公爲作墓誌著其語

張章簡華陽集四十卷

陳氏曰參政金壇張綱彥正撰大觀中舍法三中最選釋褐爲承事郎辟雍正蓋專於新學者紹興初在瑣闥忤張俊求去復與秦隙遂引年秦亡乃召用乾道初年八十四而終自號華陽老人華陽者茅山也

非有齋類稿五十卷

陳氏曰給事中吳興劉一止行簡撰宣和三年進士居瑣闥僅百餘日忤秦檜罷去閒居十餘年以次對致仕檜死被召力辭進雜學士而終年八十二實紹興庚辰

竹西集十卷 西垣集五卷

陳氏曰兵部侍郎維揚王居正剛中撰宣和三年進士紹興初入詞掖西垣集者制草及繳章也其篇目凡繳章皆云封還詞頭蓋其子孫編次者之失也除授則有詞頭政刑庶事何詞頭之有

張巨山集三十卷

陳氏曰中書舍人光化張嶠巨山撰嶠爲司勳郎官金人再取河南秦相皇恐上章引伊尹善無常主及周任不能者止之文以自解嶠之筆也秦德之遂擢修注掌制而其具稿倉卒誤以伊尹告太甲爲告湯及周任之言爲孔子自言時祕書省寓傳法寺有書其門曰周任爲孔聖太甲作成湯秦疑諸館職爲之多被逐然嶠亦以答檜三折肱之語謂其貳於已無幾亦罷

默成居士集十五卷

乾隆十二年校刊

欽定四庫全書 經籍六十六

五

陳氏曰中書舍人潘良貴子賤撰一字義榮剛介之士也朱侍講序其集畧見其出處大致

朱子序畧曰公自宣和初爲博士則已不肯托昏富貴之家而獨嘗論斥大臣蒙蔽之姦及爲館職又不肯游蔡京父子門使淮南又不肯與中官同燕席靖康召對因論時宰何臬唐恪不可用恐誤國事以是謫去不旋踵而言果驗建炎初召爲右司諫首論亂臣逆黨當用重典以正邦法壯國威且及當時用事者姦邪之狀大爲汪黃所忌書奏三日而左遷以去紹興入爲都司又忤時相以歸

復爲左史直前奏事明大公至正之道服喪還朝又以廷叱奏事官而忤旨以去自是之後秦檜擅朝則公遂廢於家而不復起矣然公平生廉介自持自少至老出入三朝而前後在官不過八百六十餘日所居僅庇風雨郭外無尺寸之田經界法行獨以邱墓之寄輸帛數尺而已其清苦貧約蓋有人所不堪者而處之超然未嘗少屈於檜其子熹暴起鼎貴勢傾內外亦未嘗與通問也嘗誦君子三戒之言而深以志得之規痛自儆飭至於造次之間一言一行凡所以接朋友教子弟亦未嘗

不以孝弟忠敬節儉正直防微謹獨之意爲本其讀書磨鏡之喻切中學者之病當世蓋多傳之而所論汲長孺蓋寬饒之爲人尤足以見其志之所存也嗚呼若公之清明直諒確然亡愆其真可謂剛毅而近仁矣夫以三代之時聖人之世而夫子已歎剛者之不可見况於百世之下幸有如公者焉而不得少申其志以沒其條奏草稿有補於時可爲後法者又以公自焚削而不復存其平生之言頗可見者獨有賦詠筆札之餘數十百篇而已後之君子蓋將由此以論公之事其可使之沒沒

無傳而遂已乎

筠溪集二十四卷

陳氏曰戶部侍郎連江李彌遠似之撰大觀三年上舍第一知冀州能抗金賊攝江東帥與忠定平周德之亂晚爲從官沮和議坐廢而終

鄱陽集十卷

陳氏曰徽猷閣直學士鄱陽洪皓光弼撰皓奉使金虜守節不屈旣歸爲秦所忌謫英州死之日與秦適相先後三子登詞科俱顯貴

東窻集四十卷

陳氏曰中書舍人鄱陽張廣彥實撰與呂居仁爲詩友其在西掖當紹興十一年

雪溪集畧八卷

陳氏曰汝陰王銍性之撰國初周易博士昭素之後也其父萃樂道嘗從歐公學銍爲曾紆壻嘗撰七朝國史紹興初常同子正薦之詔視秩史官給札奏御會秦氏柄國中止書竟不傳其子明清著揮塵錄

竹軒雜著十五卷

陳氏曰太常少卿永嘉林季仲懿成撰以趙元鎮

薦入朝奏疏沮和議得罪仲熊叔豹季狸其弟也皆知名

北山集三十卷

陳氏曰端明殿學士金華鄭剛中亨仲撰紹興二年亞魁受知秦相使川陝後忤意貶死封州

澹菴集七十八卷

陳氏曰端明殿學士忠簡廬陵胡銍邦衡撰建炎甲科第五人旣上書乞斬秦檜謫嶺海秦死得歸孝宗卽位始復官召用又以沮再和之議得罪去乾道中入爲丞郎亦不容於時奉祠至淳熙七年

乃終七十九

平園周氏跋曰胡忠簡公詩有不可及者三用事博而精下語豪而華一也士子投獻必用韻酬答雖百韻亦然愈多而愈工二也此篇和王君行簡時年七十五長歌小楷與四五十人無異三也誠齋序先生之文肖其爲人議論闕以挺其記序古以馴其代言典而嚴其書事約而悉其爲詩蓋自詆斥時宰誕置嶺海愁狄酸骨饑蛟血牙風呻雨喟濤譎波詭有非人間世之所堪耐者不介於心而反昌其詩視李杜夜郎夔子之音蓋加恢奇云

至於騷詞涵茫蘄萃鉢剝刻屈抉天之幽洩神之瘦稿癭而不瘁恫愀而不懟自宋玉而下不論也

李文簡公集一百二十卷

敷文閣學士丹稜李燾仁父撰水心集序曰自有文字以來名世數十大抵以筆勢縱放凌厲馳騁爲極功風霆怒而江河流六驥調而八音和春輝秋明而海澄嶽靜也高者自能餘則勉而效之矣雖然此韓愈所謂下逮莊騷其上無是也觀公大篇詳而正短語簡而法初未嘗藻黼琢鏤以媚俗爲意曾點之瑟方希化人之酒欲清又非以聲色

臭味自怡悅也獨於古文墜學堂上之議起虞造
周如挈裘領振之焉固遺其下而獨至其上者歟
蜀自三蘇死公父子兄弟後起兼方合流以就家
學綜練古今名實之際有補於世天下傳以繼蘇
氏云

沈子壽文集

水心集序曰吳興沈子壽少入太學名聞四方仕
四十餘年絀於王官再入郡三佐帥幕公私憔悴
而子壽老矣然其平生業嗜文字若性命在身非
外物也甲乙自著累百千首嗚呼何其勤且多也

余後學也不足以識子壽之文其不爲音險而瑰
富精切自然新美使讀之者如設芳醴珍殽足飲
饜食而無醉飽之失也又能融釋衆疑兼趨空寂
讀者不惟醉飽而已又當消愠忘憂心舒意閑而
自以爲有得於斯文也觀其開闔疾徐之間旁觀
而橫陳逸鶩而高翔蓋宗廟朝廷之文非自娛於
幽遠淡泊者也

徐斯遠文集

水心集序曰斯遠盡平生文僅二十餘首首輒精
善疑其親自料揀應留者止此爾徐觀筆墨輕重

以十一斂藏千百雖鋪寫縱放亦無怠惰剝落之態迷流陡起體勢各成殆非精揀所能致也詩險而肆對面崖壑咫尺千里操舍自命不限常律慶歷嘉祐以來天下以杜甫爲師始黜唐人之學而江西宗派章焉然而格有高下技有工拙趣有淺深材有大小以夫汗漫廣莫徒枵然從之而不足充其所求曾不如脰鳴吻映出毫芒之奇可以運轉而無極也故近歲學者已復稍趨於唐而獲焉曷若斯遠淹玩衆作凌暴偃蹇情瘦而意潤貌枯而神澤既能下陋唐人方於宗派斯又過之斯遠

有物外不移之好負山林沉痼之疾而師友學問小心抑畏異方名聞之士未嘗不遐歎長想千里而同席也初渡江時上饒號稱賢俊所聚義理之宅如漢許下晉會稽焉風流幾泯議論將絕斯遠與趙昌父韓仲止扶植遺緒固窮一節難合而易忤視榮利如土梗以文達志爲後生法凡此皆強爲善者之所宜知也

相山集二十六卷

陳氏曰朝奉大夫濡須王之道彥猷撰宣和六年兄弟三人同登科建炎寇亂率衆保明避山從之

者皆得免以功改京官沮和議得罪晚年歷麾節
其子藺被遇阜陵貴顯

韋齋小集十二卷

陳氏曰吏部員外郎新安朱松喬年撰侍講文公
之父也文公嘗言韋齋先生自爲兒童時出語已
驚人及去塲屋始放意爲詩文其詩初亦不事彫
飾而天然秀發格律閑暇超然有出塵寰之趣

關博士集二十卷

陳氏曰太學博士錢塘關注子東撰紹興五年進
士嘗爲湖州教授自號香巖居士

石月老人集三十五卷

陳氏曰朝議大夫致仕鄱陽余安行勉仲撰安行
累舉不第其子應求以童子登崇寧五年進士科
爲御史歷麾節所至迎養其父至九十六乃終著
書號至言蓋純篤之士也

王著作集四卷

陳氏曰著作郎福清王蘋信伯撰從程門學以趙
忠簡薦召對賜出身秦檜惡之會其族子坐法牽
連文致奪官以死

屏山集二十卷

陳氏曰通判興化軍崇安劉子翬彦冲撰父幹兄子羽子翬以蔭入仕年甫四十八而卒朱文公其門人也嘗謂朱曰吾少聞佛老之說歸讀吾書然後知吾道之大體用之全如此於易得入德之門爲作復齋銘聖傳論可以見吾志矣

東溪集二十卷

陳氏曰廸功郎漳浦高登彥先撰考試潮州策問忤秦相謫死

水心葉氏序略曰君高遠獨出無拘留泥滓間意學已成謂當直施用不曲步捷行以漸巧取之論

說必窮盡欲砭時陋扶世壞文不爲扶疏茂好惟自根極而成者無不具也故不得志於科舉至轉富入貧本業微析終不動心一以溪山雲月爲家宅筆墨簡策爲情性常覃研竟日日孔顏不如是也

繙經堂集八卷

陳氏曰知盱眙軍東平畢良史少董撰文簡公士安五世孫嘗陷虜有從之游者因爲圖名繙經寫其訪問紬繹之狀

三近齋餘錄

朝奉郎知信州王從正夫撰從文正公五世孫有
詩文四百八十餘篇自題三近齋餘錄楊誠齋序
略曰其詩如落木森猶力寒山淡欲無如地迴高
樓目天寒故國心如涼風回遠笛暝色帶歸舟如
塵心依水淨歸鬢與山青不減晚唐諸子如墮蘂
盡應輸燕子懶寒猶及占梨花如一番風雨催寒
食千里鶯花想故園如身閒更得憑陵酒花早殊
非愛惜春如秋生列岫雲尤薄泉瀨懸崖路更慳
置之江西社中何辨幽蘭云臨春慘不舒蓋國空
自香意不在蘭也至於騷辭如釣臺沐髮乞巧悼
亡等篇出入遠游天問之海頡頏幽通思元之囿
矣及上前論事之文皆卓然近用又如簋餐豆肉
之可以求飽笥裳篚纊之可以御冬使其遇合功
用詎可量哉紀之齷齪之瓚櫝而不讎瘞而不起
久則光怪四出貫日襲月有不可掩者惟不求知
所以不可掩也歟

藥寮叢稿二十卷

陳氏曰太常少卿上蔡謝伋景思撰參政克家之
子

水心葉氏序略曰崇觀後文字散壞相矜以浮肆

於險膚無據之辭苟以蕩心意移耳目取貴一時
雅道盡矣謝公尚童子脫巾髦游太學俊筆湧出
排窄老蒼而不能不受俗學薰染自漢魏根底齊
梁波流上遡經訓旁涉傳記門樞戶鑰庭旅陞列
撥棄組繡考擊金石洗削纖巧完補太樸其藥園
小畫記蓋謝靈運山居之約言志潔而稱物芳無
憂憤不堪之情也

巖壑老人詩文一卷

陳氏曰左朝請大夫洛陽朱敦儒希真撰初以遺
逸召用嘗爲館職旣挂冠秦檜之孫塤欲學爲詩

起希真爲鴻臚少卿將使教之

鶴溪集十二卷

陳氏曰辟雍博士青田陳汝錫師予撰紹聖四年
進士持節數路帥越而卒青田登科人自汝錫始
希點子與其孫也

岳武穆集十卷

陳氏曰樞副鄴郡岳飛鵬舉撰飛功業偉矣不必
以集著也世所傳誦其賀和議成一表當亦是幕
客所爲而意則出於岳也

漢濱集六十卷

陳氏曰參政襄陽王之望瞻叔撰周益公爲集序
序略曰公生於羊杜成功之地慕其爲人博學能
文知略輻輳學根於經故有淵源文適於用故無
枝葉奏劄甚多皆可行之言內制雖少得坦明之
體酷嗜吟詠詞贍而理到近世論文章事業公實
兼之豈與夫一編一曲之士較短量長而已

玉山翰林詞草五卷

陳氏曰尚書玉山汪應辰聖錫撰紹興五年進士
首選本名洋御筆改賜天才甚高而不喜爲文謂
不宜敝精神於無用然每作輒過人以天官兼翰

苑近二年所撰制誥溫雅典實得王言體朱晦翁
稱爲近世第一

太倉稊米集七十卷

陳氏曰樞密編修宣城周紫芝少隱撰自號竹坡
居士

白蘋集四卷

陳氏曰右文林郎單父龐謙孺祐甫撰莊敏公籍
之曾孫也用季父恩仕不遂而死韓南澗志其墓
嘗客居吳興故集名白蘋

南澗甲乙稿七十卷

陳氏曰吏部尚書潁川韓元吉無咎撰門下侍郎維之元孫與其從兄元龍子雲皆嘗試詞科不利居廣信溪南號南澗

艇齋雜著一卷

陳氏曰南豐曾季狸喪父撰鞏之弟曰湘潭主簿宰宰之孫曰大理司直晦之季狸其子也多從呂居仁徐師川游曾一試禮部不中乾淳間名公多敬畏之具見其子濰所集師友尺牘此篇蓋其議論古今之文辭質而義正可以得其人之大略

溪園集十卷

陳氏曰蘄春吳億大年撰其父擇仁爲尚書億仕至靜江倅居餘干有溪園佳勝世傳其樓雪初消詞爲建康帥鼂謙之作

于湖集四十卷

陳氏曰中書舍人歷陽張孝祥安國撰甲戌冠多士出思陵親擢秦相孫塤旣居其下秦忌惡之以他事下其父子大理獄明年秦亡上旣素眷不五年登法從阜陵尤眷之不幸不得年死時才四十餘上常有有用不盡之歎其文翰皆超逸天才也

南軒集三十卷

陳氏曰侍講廣漢張棻欽夫撰魏忠獻公浚之長子當孝宗朝以任子不賜第入西掖者韓元吉劉孝遹其入經筵則棻也

王司業集三十卷

陳氏曰國子司業宛邱王逯致君撰建炎初其家避狄沿汴南下逯年十一偶小泊登岸虜適至亟解維不暇顧遂失之在虜十年間關得歸其父工部尚書候既歸入太學登癸未科爲諫官御史歷麾節終於少司成

周平園序略曰公志氣強學問博其文章贍而不失之泛嚴而不失之拘議論馳騁於數千百載之上而究極利害於四方萬里之遠其爲歌詩慷慨憂時而比興存焉他文閎辯該貫直欲措諸事業所謂援古證今黼黻其辭特餘事耳

浮山集十六卷

陳氏曰左朝請大夫江都仲并彌性撰紹興壬子進士晚丞光祿寺得知蘄州并嘗倅湖籍中有所盼爲作生朝青詞好事傳誦之遂漏露坐謫官其訓詞略曰爾爲瀆侮之詞曾不知畏天其知畏吾法乎吾鄉前輩能道其事如此

周平園序略曰彌性自少卓犖不羣潛心問學力
排王氏一偏之說惟六藝孔孟是師筆勢翩翩俊
聲籍甚古律如王良造父馭駿馬駕車有犇軼絕
塵之勢其賡險韻如繭抽絲印印泥愈出愈新送
妹長篇孝友慈愛溢於言外殆欲上規風雅其四
六叙事雖閎肆而關鍵甚密對屬雖切而非駢儷
所能拘最後蘄州謝上表以古文就今體自成一
家雜著題跋清雅可愛復以餘力出入釋氏游戲
歌詞無不過人

小醜集十二卷 續集三卷

陳氏曰直秘閣眉山任盡言元受撰元符諫官伯
雨之孫紹興從臣申先之子甲科仕爲太常寺主
簿終於閩憲

楊誠齋序謂其詩文孤峭而有風稜雄健而有英
骨忠慨而有義氣蓋將與唐之貞元元和本朝之
慶歷元祐諸公並轡而先終非近世陳陳相因累
累隨行之作也

拙齋集二十二卷

陳氏曰校書郎侯官林之奇少穎撰之奇學於呂
氏本中而太史祖謙學於之奇其登第當紹興辛

未年已四十未幾卽入館方鄉用而得未疾
霜傑集三十卷

陳氏曰德興董穎仲達撰紹興初人從汪彥章徐
師川游彥章爲作序

妙峰集四十卷

陳氏曰中書舍人福清林通述中撰元符三年甲
科苗劉之變在西掖不失節思陵嘉之終龍圖直
學士

鄮峰真隱漫錄五十卷

陳氏曰丞相文惠公四明史浩直翁撰

詒癡符二十卷

陳氏曰御史臨海李庚子長撰詒之義銜鬻也市
人鬻物於市誇號之曰詒此三字本出顏氏家訓
以譏無才思而流布醜拙者以名其集示謙也庚
乙丑進士以湯鵬舉薦辟入臺家藏書甚富

梯雲集二十五卷

陳氏曰中書舍人資川趙達莊叔撰辛未大魁有
氣節四十一歲卒

海陵集三十二卷

陳氏曰同知密院海陵周麟之茂振撰乙丑進士

戊辰詞科既執政被命使虜亮辭行得罪去

胡獻簡詞垣草四卷

陳氏曰禮部尚書會稽胡沂周伯撰

介庵集十卷

陳氏曰左司郎官趙彥端德莊撰乾淳間名士也嘗宰餘干趙忠定其邑人初冠多士德莊在朝往謁謝德莊語之曰謹勿以一魁先置胷中可謂名言

文獻通考卷第二百三十九



